

KULTURNA I JAVNA DJELATNOST MEDRESE U ŠKOLSKOJ 2023/2024. GODINI

Počela školska 2023/24. godina

Nastava u školskoj 2023/24. godini u Behram-begovoj medresi počela je u ponedjeljak 4. septembra 2023. godine. Dan ranije, u nedjelju 3. septembra, izvršen je upis učenika I-III razreda u školu i učenički dom, dok su maturanti isti dan otputovali na svoju ekskurziju. Toga dana održani su i roditeljski sastanci s razrednicima i odgajateljima. U prvi razred je upisano 76 učenika i 66 učenica. U ovoj školskoj godini našu školu pohađaju ukupno 523 učenika, 259 učenika i 264 učenice.

Učenice pobratimske škole iz Istanbula borave u Medresi

U našoj školi boravi grupa učenica i profesorica iz pobratimske škole Rabia Kiz Anadolu Imam Hatip Lisesi iz Istanbula. One učestvuju u studijskom programu razmjene učenica između dviju medresa. Podsjetimo se, grupa učenica naše škole bila je u februaru ove godine u njihovoj školi. Išli su na časove, družili se s učenicama domaćinima i učili o historiji Turske. Tokom ove uzvratne posjete

organizirana je edukacija naših učenica iz crtanja i kaligrafije, koju vodi poznata i nagrađivana profesorica Nilgun Birben, dok poduku iz kiraeta vodi profesorica Fatma Gok. S druge strane, naše profesorice engleskog jezika Amila Hasanspahić i Suvada Osmančević vodile su radionice iz ovog jezika za gošće iz Istanbula. U utorak 5.9.2023. godine organizirani su prijemi za gošće kod direktora Behram-begove medrese Ahmeda Hatunića i muftije tuzlanskog Vahid-ef. Fazlovića. Gošće su taj dan obišle jezgro Tuzle i poznate historijske znamenitosti u gradu. U srijedu je održan program dobrodošlice na kojem su nastupili hor i orkestar naše škole, a bogat repertoar se sastojao od poznatih ilahija, pjesama, sevdalinki i recitacija. U četvrtak 7.9.2023. godine gošće iz Turske u pratnji profesora i profesorica iz Behram-begove medrese posjetile su Memorijalni centar u Potočarima. Nakon historijskog časa pogledale su film o Genocidu. U petak 8.9.2023. godine organizirano je druženje s profesoricama Behram-begove medrese, na kojem su razmijenjena iskustva o radu u nastavi. Preko vikenda učenice iz Istanbula borave u porodicama naših učenica, gdje se druže i uče o bogatoj tradiciji naše zemlje.

Izveden program dobrodošlice za učenice prvog razreda

U četvrtak, 14.9.2023. godine u Behram-begovoj medresi je održan program dobrodošlice za učenice prvog razreda. Program su tradicionalno pripremile i izvele učenice drugog razreda. Bila je ovo prilika da se učenicama pokaže da nisu same i da se uz učenje Kur`ana, ilahija, izvođenjem sevdalinki, dramskog prikaza, recitacija, modne revije i folklora opuste i na trenutak zaborave na odvojenost od porodice. Za njih su pripremljeni i posebni pokloni, koji su brižljivo birani kao znak dobrodošlice u našu školu. Posebne gošće su bile učenice i profesorica iz pobratimske škole Rabia Kiz Anadolu Imam Hatip Lisesi iz Istanbula, koje već drugu sedmicu borave u Behram-begovoj medresi.

I učenice iz Turske učestvovalе na ženskom mevludu u Behram-begovoj medresi

Tradicionalni ženski mevlud koji se svake godine održi povodom rođenja posljednjeg Božijeg poslanika Muhammeda, a.s., proučen je u petak 15.9.2023. godine nakon akšam-namaza, u džamiji Behram-begove medrese. Mevlud su proučile članice hora naše škole, a svečarskoj atmosferi uveliko su doprinijele gošće iz pobratimske škole Rabia Kiz Anadolu Imam Hatip Lisesi iz Istanbula, koje su proučile dio mevluda na turskom jeziku. Hafiza Zubejda Gobeljić održala je prigodan govor o Poslaniku u kojem je istakla odgojnu dimenziju njegove misije. Nakon programa je održana prodajna izložba domaćih kolača, koje su pripremile profesorice Medrese. Sva prikupljena sredstva od prodaje kao i prethodnih godina bit će usmjerena u humanitarne svrhe. Mevludu su prisustvovalе profesorice naše i Medrese iz Istanbula, majke naših učenika i učenica, predstavnice iz Odjela za brak i porodicu sa područja Muftiluka tuzlanskog sa svojim članicama iz Janje, Bosanskog Šamca, Živinica, Lukavca, Odžaka i Tuzle. Ovaj mevlud je podsjećanje kako se nekad po našim bosanskim kućama učio mevlud. Ova lijepa tradicija se njeguje i čuva od zaborava već godinama u Behram-begovoj medresi. Mevlud je organiziran u saradnji s odjelima za brak i porodicu Medžlisa Islamske zajednice Tuzla i Muftijstva tuzlanskog.

Generacija učenika trećeg razreda u Konjicu

Učenici trećeg razreda Behram-begove medrese su u petak 15.9.2023. godine boravili su u Konjicu. Bila je ovo prilika da se učenici Medrese upoznaju s bogatom historijom ovog grada. Posjetili su Muzej drvorezbarstva, koji je otvoren 2019. godine i koji se sastoji od eksponata tradicionalno obrađenih materijala i od raznih predmeta savremenih linija i dizajna. Bila je ovo prilika da se učenici upoznaju i s bogatom tradicijom ovog malog grada, koji baštini tradiciju drvorezbarstva staru preko stotinu godina. Konjičko drvorezbarstvo nalazi se od 2017. godine na UNESCO listi nematerijalne svjetske baštine upravo zbog prepoznatljivosti u načinu obrade drveta. Postavku muzeja čine stari komadi namještaja, alati,

fotografije, historijski dokumenti. Arhitektura enterijera muzeja je zanimljiva, jer je primijenjena crvotočine rupe iz Ajnštajnovne teorije relativiteta. U tunelima su postavljeni paneli sa multimedijalnim sadržajima. Jedna prostorija ima zidove obložene s 200 horklica Tattoo, koje je dizajnirao čuveni švedski arhitekta Gerth Wingardh. Na okruglim drvenim horklicama su ispisana imena preminulih drvorezbara iz više generacija koji su živjeli u Konjicu. Uz Muzej se nalazi i mala zanatska radnja u kojoj se može pogledati tradicionalni način obrade drveta. Nakon ove posjete uslijedio je obilazak Zavičajnog muzeja u Konjicu, koji sadrži bogatu postavku raznih eksponata iz prošlosti. Na kraju posjete ovom zanimljivom gradu obišli su rodnu kuću čuvenog bosanskohercegovačkog putopisca i karikaturiste Zuke Džumhura. U njoj se nalazi bogata zbirka njegovih radova i ličnih fotografija. Neizostavan je bio i prelazak preko čuvene kamene ćuprije izgrađene 1682. godine. Ratna razaranja nisu je zaobišla tako da je srušena 1945. godine od strane Njemačke vojske. Ćuprija je ponovo izgrađena 2009. godine.

Generacija učenika drugog razreda u Sarajevu

U četvrtak 21.9.2023. godine učenici drugog razreda Behrambegove medrese posjetili su Sarajevo. Obišli su Fakultet islamskih nauka i tom prilikom učenicima se obratio prof.dr. Muhamed Fazlović. Upoznao je učenike sa historijom ove ustanove, te je pričao o studijskim smjerovima i mogućnostima zapošljavanja nakon završenog fakulteta. Nakon ove posjete obišli su Muzej Alije Izetbegovića. Pogledali su stalnu postavku koja je smještena u kulama Ploča i Širokac. U njemu su mogli vidjeti kroz tekst i fotografije život prvog predsjednika Republike Bosne i Hercegovine kao političara i državnika. Također su mogli pogledati muzejsku postavku posvećenu njemu kao Vrhovnom komandantu i organiziranju odbrane u vrijeme Agresije na Bosnu i Hercegovinu. Bila je ovo izuzetno zanimljiva posjeta našoj prijestolnici i prilika da učenici saznaju dosta novih informacija.

Maturanti Behram-begove medrese posjetili Tursku

U nedjelju, 3.9.2023. godine, učenici četvrtog razreda naše škole krenuli su na naturalnu ekskurziju u Tursku. U toku boravka obišli su džamije Sulejmaniju, Sultan-Ahmedovu džamiju, hipodrom, Kapali Čaršiju, Arasta bazar, Uskudar, Čamlidžu, muzeje Panorama i Miniaturk, te su krstarili Bosforom. U narednim danima učenici su posjetili Bursu, Cumalikizik Koyu selo koje se nalazi na UNESCO-voj listi svjetske baštine. Kada su se vraćali kući obišli su i Edirne. Bilo je ovo izuzetno putovanje na kojem su učenici posjetili mnogobrojne historijske znamenitosti, od kojih se dosta nalazi na listi UNESCO-ve Svjetske baštine. U pratnji učenika bili su njihovi razrednici i odgajatelji: Samir Spahić, Kemal Jusufović, Smail Hašarić, Emina Hatunić, Mukelefa Behaderović i Ehlimana Suljić i profesori Halil Mehanović, Merzija Kasumović i Mehmedalija Čandić. U Tuzlu su se vratili u nedjelju 10.9.2023. godine.

Medresin hor u Ljubljani i Sisku izveo mevlud

Hor Behram-begove medrese je u subotu i nedjelju 22. i 23. septembra ove godine boravio u Sloveniji i u Hrvatskoj. U subotu je povodom rođenja posljednjeg Božijeg poslanika Muhammeda, a.s., proučen mevlud u Muslimanskom kulturnom centru u Ljubljani, pred velikim brojem vjernika. Mevludskoj svečanosti su prisustvovali muftija slovenački Nevzet-ef. Porić, slovenački glavni imami, imami i predsjednici izvršnih odbora, te džematlije iz Ljubljane i drugih džemata. Dobrodošlicu je uputio Senad-ef. Karišik, glavni imam Kulturnog centra Ljubljana, a prigodno predavanje je održao muftija Porić. Poslije programa je slovenačka Mreža mladih organizirala druženje mladih s učenicima Behram-begove medrese. Sutradan su u Islamskom kulturnom centru u Sisku članovi hora učestvovali u svečanom mevludskom programu *Volimo te, Ya Rasulallah*. Bili su gosti ovog programa, na kojem su proučili mevlud i izveli nekoliko ilahija. Ovdje je predavač bio profesor Behram-begove medrese hafiz Nedžad Vehabović. Govorio je o ljepoti Poslanikovog življenja, s akcentom na njegovu ljudsku i poslaničku misiju.

Medresin mevlud za tuzlanske srednjoškolce

U džamiji Behram-begove medrese je u srijedu 27.9.2023. godine proučen mevlud povodom rođenja posljednjeg Božijeg poslanika Muhammeda, a.s. Članovi hora naše škole su učenjem mevluda i ilahija obilježili ovaj veliki događaj. Programu su prisustvovali i obratili se direktor Behram-begove medrese Ahmed Hatunić i muftija tuzlanski Vahid-ef.Fazlović. Prisustvovali su mu profesori, učenicima i učenicima naše škole. Mevludsko predavanje je Asmir-ef. Bekrić, imam u džematu Maoča Stara u Brčkom. U svom obraćanju je potencirao odgovornost svakog od nas koju imamo u ovom vremenu. I ove godine mevludskom programu su prisustvovali učenici i učenicima sa svojim vjeroučiteljima iz Građevinsko-geodetske škole, Elektro-tehničke škole i Gimnazije Ismet Mujezinović. U našoj školi se povodom mjeseca rebiu-l-evvela održao i ženski mevlud 15.9.2023. godine. Planirane su još neke aktivnosti u narednom periodu.

Učenici Medrese učestvovali u akciji "Let`s do it"

U petak 15.9.2023. godine, članovi ekološko-botaničke sekcije Behram-begove medrese učestvovali su u ekološkoj aktivnosti „*Let`s do it*“. Ova akcija čišćenja ilegalnih deponija održala se na više lokaliteta, a učestvovali su i učenici iz drugih srednjih i osnovnih škola sa područja grada Tuzle. Akcija *Očistimo planetu Zemlju* redovno se održava početkom školske godine. Članovi ekološko-botaničke sekcije Behram-begove medrese su čistili otpad od lokaliteta parka kod Rudarsko-geološko-građevinskog fakulteta, dužinom rijeke Jale, do parka kod Bosanskog kulturnog centra. Ova terenska aktivnost podiže svijest kod učenika o važnosti zbrinjavanja i odlaganja otpada na predviđeno mjesto, te izgrađuje svijest koliko malo truda treba uložiti da bi okruženje u kojem živimo bilo ljepše za život.

Najljepša učionica III

Svake godine Behram-begova medresa raspisuje konkurs za najbolje uređenu učionicu povodom Dana škole. U četvrtak 5.10.2023. godine komisija je pregledala učionice i izabrala tri najljepše. Prvo

mjesto pripalo je IIIId, drugo mjesto zauzeo je Id i treće mjesto dijele učenice Ic i IId. Učenice su ponovo pokazale kreativnost i svoj talenat su mogle izraziti i sve one učenice koje vole kaligrafiju i slikanje. Ovo takmičenje traje godinama i učenice imaju priliku da oplemene prostor u kojem provode dosta vremena.

Svečanom sjednicom obilježeni Dan učitelja i Dan škole

Povodom 5. oktobra, međunarodnog Dana učitelja, i 6. oktobra, Dana Behram-begove medrese, održana je svečana sjednica Nastavničkog vijeća. Podsjetimo se, davne 1993. godine, na dan 6. oktobra, zazvonilo je prvo školsko zvono nakon četverodecenijske pauze u radu Medrese. Od tada, škola je hrabrim koracima išla naprijed i polahko vraćala svoj prepoznatljivi ugled i mjesto u društvu. Na sjednici se obratio direktor Behram-begove medrese Ahmed Hatunić. On se u svom obraćanju prisjetio ljudi koji su radili u Medresi i koji su svojim djelom snažno opečatili vrijeme u kojem su radili, a koji više nisu s nama. Muftija tuzlanski Vahid-ef. Fazlović u svom obraćanju je podsjetio na početak rada Medrese davne 1993. godine i na ratne uslove u kojim se odvijala nastava i nastavni proces. Čestitao je 6. oktobar i istakao da je to važan datum koji je važan za naš grad i za zajednicu. U svečanom dijelu sjednice, dodijeljena su priznanja profesoru Asmiru Imamoviću, Hadžiri Ibrahimbegović koja radi na održavanju higijene i Nermini Salkanović, zaposlenoj u kuhinji. Profesor Asmir Imamović je rođen u Vukovijama Donjim, u Kalesiji 1976. godine, od oca rahmetli Fadila i majke rahmetli Naile. Završio je Gazi Husrev-begovu medresu 1996. godine. Nastavio je školovanje u Kairu na Univerzitetu Al-Azhar. Upisuje postdiplomske studije na istoimenom fakultetu 2000-2002. godine i uspješno okončava ispite i prijavljuje temu za magistarsku disertaciju. Vraća se u domovinu i 2003/2004. godine radi kao vjeroučitelj u osnovnoj školi Tušanj. A 2004/2005. radi kao imam, hatib i muallim u džematu Gračanica Selo. Od 2005. godine do 2013. godine radi kao odgajatelj u Medresi. U nastavi je od 2013. godine i predaje akaid. Aktivno govori arapski i engleski jezik. S arapskog jezika je preveo nekoliko djela. Hifz je položio 2019.

godine. Od 2023. godine stalni je sudski tumač za arapski jezik. Oženjen je i otac dvoje djece. Hadžira Ibrahimbegović je rođena 1960. godine u Gornjoj Kamenici, općina Zvornik. Tokom Agresije na Bosnu i Hercegovinu izbjegla je na slobodnu teritoriju, na područje Tuzle gdje i sada živi. Ponosna je majka sina i kćerke, danas profesora. U Behram-begovoj medresi radi od 1. aprila 1997. godine na održavanju higijene. Nermina Salkanović je rođena 1977. godine u Tuzli. U Behram-begovoj medresi radi od 1996. godine. Majka je kćerke koja ovih dana uspješno okončava fakultetsko obrazovanje. Zaposlena je kao kuhar u Medresi.

Na terenskoj nastavi u Gradačcu

Učenici Behram-begove medrese, koji idu na izbornu nastavu iz predmeta biologija i hemija su u četvrtak 28.9.2023. godine posjetili mliječnu industriju "migg" u Gradačcu. Ova posjeta je realizirana u okviru terenske nastave koju redovno planiraju profesori hemije i biologije u svom godišnjem planu i programu rada sa učenicima. Obišli su firmu "migg" i vidjeli su kako se proizvode određeni mliječni proizvodi, koji su dostupni na policama u radnjama širom naše domovine. Ovom prilikom su usvojili praktična znanja i vještine iz prehrambene tehnologije. Obišli su jezera Vidaru i Haznu, koja su od posebnog značaja za razvoj ekološke svijesti i koja su u direktnoj vezi sa florom i faunom ovog područja.

Maturantice IVd postale vakife

U Behram-begovoj medresi je 7.10.2023. godine održan program posvećen vakifima naše škole. Ove godine su se i učenice IVd, koje pripadaju 348. generaciji Behram-begove medrese, odlučila za ovaj izuzetan korak. Naime, maturantice su, motivirane kur`anskim ajetom: **A što god vi udijelite On će to nadoknaditi, On najbolje opskrbljuje**, odlučile se da svojoj školi u trajno naslijede ostave nešto što će koristiti i narednim generacijama. Saznale su da se gradi novi objekat i odlučile su da sredstva usmjere u ovu svrhu. U ramazanu su pokrenule ovu ideju i za nekoliko mjeseci je i realizirale. Sada su ponosne vakife Behram-begove medrese.

U znaku izgradnje novog objekta obilježen Dan vakifa Behram-begove medrese

Dan vakifa Behram-begove medrese tradicionalno se obilježava u oktobru svake godine. U svečanoj atmosferi dodijele se vakufname prijateljima naše škole, koji su tokom protekle godine svojim materijalnim dobrima podržali njen rad i školovanje njenih učenika. Ovogodišnja svečanost je održana u subotu 7.10.2023. godine. Program su izveli hor i orkestar naše škole, te recitatori i članovi dramske sekcije, koji su probranim ajetima, hadisima i tekstovima istakli važnost darivanja. Prisutnima je govorio direktor Behram-begove medrese Ahmed Hatunić. On se u svom obraćanju osvrnuo na alumniste, koji su već u više navrata uvakufili određena novčana sredstva, a i ove godine je nekoliko generacija slijedilo njihov primjer. Direktor Hatunić je istakao da su Medresini alumnisti svjetionici dobra i da šire lijepu priču o našoj školi. Osvrnuo se na prošlu školsku godinu i podsjetio je da je Behram-begova medresa ponovo proglašena najboljom školom u Tuzlanskom kantonu, a prema vrednovanju Pedagoškog zavoda. Istakao je važnost sekcija u našoj školi i osvrnuo se na veliki broj nastupa hora i orkestra, na njihov prvi koncert u svom gradu Tuzli, ali i na historijske nastupe u Vlasenici i Srebrenici. Gostima se prigodno obratio i muftija tuzlanski Vahid-ef. Fazlović. Govorio je o izgradnji nove zgrade u kompleksu u kojoj će biti učionice, prostori za iznajmljivanje i prostori za održavanje sekcija, vannastavnih i slobodnih aktivnosti učenika. Prisjetio se ranijih projekata i vakifa koji su ih podržali i u njih uključivali i svoju rodbinu. Istakao je da je jedna generacija alumnista uvakufila 40.000 KM. Na kraju obraćanja ponovio je da sve prolazi, ali ostaju djela trajne vrijednosti, a vakuf je postavljen na prvo mjesto. U toku programa emitiran je i kraći video, koji se može pogledati na YouTube kanalu Medrese, a na kojem je predstavljen izgled novog edukativno-poslovnog objekta čija gradnja je počela, a nalazi se u kompleksu Behram-begove medrese. I ove godine alumnisti Behram-begove medrese su uvakufili određena novčana sredstva. Riječ je o 273. i 277. generaciji Behram-begove medrese, a maturantice IVd odjeljenja su se pridružile ovoj velikoj lepezi vakifa. Udruženje muslimanki Sumejja iz Kalesije i Udruženje žena

džemata Lousanne iz Švajcarske su postale vakifima naše škole i džemati Bošnjacka zajednica Rosenheim iz Njemačke i Džemat Gazi Husrev-beg iz Beča. I profesori i drugi uposlenici Medrese su vakifi Behram-begove medrese.

Lamija Jakubović najvolonter Behram-begove medrese

U srijedu 4.10.2023. godine najaktivnijim članovima volonterske sekcije naše škole dodijeljeni su certifikati. Svečanosti je prisustvovao direktor Behram-begove medrese Ahmed Hatunić i uručio je certifikate. Za najvolontera Behram-begove medrese proglašena je Lamija Jakubović, učenica trećeg razreda, drugo mjesto je zauzeo Eldin Kamenjašević, učenik trećeg razreda. Treće mjesto dijele učenice drugog razreda Esma Rahmanović i Ilma Šečić. Direktor Hatunić je pohvalio rad volonterske sekcije i istakao da je zalaganje ovih učenika u prošlom periodu od izuzetne važnosti za našu školu i da oni trebaju biti primjer drugim učenicima. Ukupno dvadeset učenika je dobilo certifikate. Naime, oni su u toku prošle godine volontirali i nesebično pomagali u Zavodu za odgoj i obrazovanje osoba sa poteškoćama u razvoju u Tuzli, Specijalnoj biblioteci Behram-beg i Predškolskoj ustanovi Aladin u Tuzli. Pored ovih aktivnosti uzeli su učešće u mnogim drugim humanitarnim akcijama u gradu, ali i u drugim mjestima. Volontersku sekciju vode profesorice Mersa Šabanović Ibišević i Medina Hamzabegović.

Srednjoškolci iz Tuzle na radionici o Poslaniku

Povodom rođenja posljednjeg Božijeg poslanika Muhammeda, a.s., u Behram-begovoj medresi je za srednjoškolce organizirana učenička radionica u utorak 10.10.2023. godine. Na radionicu su učesnici pisali esej na temu *Poslanik kao uzor: društveni angažman u zajednici*. Također je organiziran i kviz o životu Muhammeda, a.s. Ovo je osma radionica, a učestvovalo je devet srednjih škola s područja Tuzle: Gimnazija Meša Selimović, Gimnazija Ismet Mujezinović, Ekonomsko-trgovačka škole, Građevinsko-geodetska škola, Srednja muzička škola Čestmir Dušek, Turističko-ugostiteljska,

Srednja medicinska škola, Srednja mješovita škola i Medresa. Na ovu manifestaciju učeničkog znanja o Poslaniku, pristiglo je 7 eseja, a žiri je sve pregledao i zaključio da su tri najbolja:

- Ajla Fazlić (Gimnazija Meša Selimović),
- Lamija Mahmutović (Gimnazija Ismet Mujezinović),
- Elvira Avdić (Medicinska škola).

Na kraju su zbrajani i ostali rezultati, pa su u ekipnom plasmanu prve tri škole bile:

- Gimnazija Meša Selimović,
- Medicinska škola,
- Gimnazija Ismet Mujezinović.

Maturanti na mirnim protestima majki Srebrenice

Kao i svakog 11. u mjesecu i ovaj put su članice udruženja Žene Srebrenice održale mirne proteste u Tuzli. Ove srijede na protestima podrška su bila dva odjeljenja učenika i učenica Behram-begove medrese. Oni su zajedno sa svojim profesorima i odgajateljima htjeli pokazati da su uz majke koje su ostale bez svojih sinova, te da nisu zaboravili na ubijene Bošnjake Podrinja. Nakon mirne protestne šetnje u Čaršijskoj džamiji predale su hatmu nevino ubijenim u Genocidu. Već 28 godina majke Srebrenice tiho i dostojanstveno podsjećaju na zločin koji se desio i na slab proces identifikacije tijela.

Misak u Muzeju istočne Bosne

Povodom 5. oktobra, Dana učitelja u Muzeju istočne Bosne u Tuzli otvorena je izložba Znanjem u odbrani domovine Bosne i Hercegovine. Izložbu su u četvrtak 12.10.2023. godine posjetili članovi redakcije školskog lista Misak i učenice trećeg razreda Behram-begove medrese. O izložbi je je govorio autor Nermin Ibrić, kustos historičar u Muzeju. Izložba se sastoji od velikog broja fotografija iz perioda 1993-1995. godina koje su napravljene u improvizovanim školama Međeđi, Sapni, Godušu i drugim mjestima. Neke od tih škola su bile udaljene svega 200 metara od neprijateljskih linija.

Na fotografijama su učenici koji su pohađali nastavu u nevjerovatno teškim uslovima, ali su uz velike napore uspjeli da se obrazuju. Ova izložba je i emotivna, jer podsjeća na junaštvo i hrabrost malog bosanskog čovjeka. Jedan od njih je i Jusuf Gašić, koji je od vatrenog plamena spasio matične knjige, koje se sada nalaze u Osnovnoj školi Sapna. Tih ratnih godina školu je upisalo preko 2000 učenika, i uspješno su priveli svoje obrazovan kraju. Neki od njih su na fotografijama kako bi nas podsjetili na izuzetnu hrabrost njihovih roditelja, i na vrijeme u kojem je svega nedostajalo, osim sloge i zajedništva.

Učenice posjetile meteorološku stanicu

U srijedu 11.10.2023. godine učenice drugog razreda su posjetile meteorološku stanicu Bukovčić. Dežurni meteorolog upoznao je učenice s uređajima i mjernim instrumentima unutar meteorološke stanice. Učenice su izlaskom na teren na drugačiji način približile znanje iz meteorologije.

Prvi razred posjetio Biblioteku Behram-beg

Obilježavajući oktobar kao mjesec knjige, učenice prvog razreda naše škole su u utorak 17.10.2023. godine boravile u Biblioteci Behram-beg. O historijatu biblioteke, s posebnim osvrtom na bibliotečki fond i građu na orijentalnim jezicima, govorio im je njen uposlenik Jusuf Džafić. Bibliotekar Sead Husić je govorio o važnosti i značaju čitanja, te o važnosti obilaska institucija koje su od značaja za opću kulturu. Sve učenice su dobile članske karte i mogućnost korištenja usluga Biblioteke. Bila je ovo korisna posjeta, jer su učenice mogle čuti dosta novih i zanimljivih informacija. Biblioteka Behram-beg posjeduje bogat i raznovrstan bibliotečki fond od 85.000 bibliotečkih jedinica. Ima i 2.104 člana koji mogu besplatno koristiti knjige. Ova biblioteka posjeduje i rukopise stare 500 godina.

Institut Yunus Emre realizovao radionice za učenice Medrese

U srijedu, 18.10.2023. u Behram-begovoj medresi je realizovana radionica tradicionalne turske umjetnosti. Radionici su prisustvovali profesori sa Akademije likovnih umjetnosti Mimar Sinan, član Nadzornog odbora Instituta Yunus Emre prof.dr. Ahmet Sacit Acikgozogl u i studentice. Učenice koje su članovi sekcija kreativnih radova, hora i fakultativne nastave iz turskog jezika imale su priliku da se upoznaju sa umjetnostima kao što su ebru, tezhip, kati' i minijatura. Također je upriličena promocija turskih instrumenata kanun i ud. Bila je ovo izuzetna prilika da isprobaju tehnike slikanja i da uz pratnju kanuna i uda prouče nekoliko ilahija. Radionica je bila izuzetno zanimljiva i uspješna, jer su učenice imale priliku da otkriju nove talente. Medresa je od Yunus Emre instituta dobila i vrijednu donaciju udžbenika turskog jezika za potrebe izvođenja izborne i fakultativne nastave iz turskog jezika.

Treći razred obišao memorijalne centre Potočari i Veljaci

U srijedu 18.10.2023. godine učenici trećeg razreda Behram-begove medrese u pratnji profesora i odgajatelja posjetili su memorijalni centar Potočari i Veljaci. Na putu za Potočare zaustavili su se u Memorijalnom centru Veljaci u Bratuncu, gdje su prisustvovali historijskom času koji je održao Mersudin ef-Majstorović. On se osvrnuo na Agresiju i spomenuo je da je do sada ukopano 300 civilnih žrtava iz proteklog rata. Također je podsjetio da je ovdje ukopano dosta ubijene djece, skoro jedno obdanište. Ovdje su svoj smiraj našli blizanci koji su pronađeni u masovnoj grobnici u Zalužju. Dolaskom u Memorijalni centar Potočari, nakon klanjanja namaza i predaje hatme učenici su prisustvovali historijskom času. Poslije su obišli fabriku akumulatora gdje su pogledali izložbu *Koracima onih koji nisu prešli*, pogledali su film o Genocidu i obišli su muzej u kojem su pogledali svjedočenja i ispovijesti preživjelih u Genocidu. Muzej je sačinjen od multimedijalne sobe, a pored nje je u nekoliko soba smješten Muzej genocida napravljen u saradnji sa vlastima iz

Holandije. Memorijalni centar Potočari svake godine posjeti veliki broj srednjoškolaca iz cijele Bosne i Hercegovine i drugih zemalja. I učenici Behram-begove medrese svake godine obilaze ovo mjesto stradanja u kojem je do sada ukopana 6751 žrtva. Još uvijek se traga za 1200 ubijenih Bošnjaka.

Medreslije na Danu kruha u Katoličkom školskom centru

U prostorijama Katoličkog školskog centra Sveti Franjo u Tuzli u petak 20.10.2023. godine održana je tribina povodom Dana kruha na temu *Odnos prema hrani-treba li ga mijenjati*. Na tribini su učestvovali učenici Behram-begove medrese koji idu na izbornu nastavu iz biologije. Grupa učenika iz naše škole govorila je o tome kakav bi trebao biti naš odnos prema hrani sa aspekta islama. Na tribini su učestvovali učenici iz Srednje Medicinske škole, Katoličkog školskog centra Sveti Franjo i Behram-begove medrese. Obilježavanje Dana kruha traje godinama i svake godine u toku mjeseca oktobra prigodnim aktivnostima pokušava se ukazati na važnost žitarica u ishrani. Bila je ovo prilika da se kroz izlaganje profesora, učenika i izložbene aktivnosti ukaže na važnost zdrave ishrane, na upoznavanje mladih sa žitaricama i njihovom zastupljenošću u svakodnevnom životu.

Učenice Medrese nosile roze mahrame na Dan roze hidžaba

U četvrtak, 19.10.2023.godine u Behram-begovoj medresi nošenjem roze mahrame i roze vrpce učenice su obilježile Dan roze hidžaba. Ove godine i učenici naše škole su podržali ovu aktivnost tako što su nosili roze vrpce. Oktobar mjesec je mesec kada se radi na razvijanju svijesti o važnosti prevencije, ranog otkrivanja i liječenja raka dojke. Jedan dan u oktobru se odvoji za razne prezentacije, edukaciju i razgovore o podizanju svijesti o rasprostranjenosti ove bolesti i razvijanju suosjećanja sa ženama koje su bolesne, a žive u našem okruženju. Ovu aktivnost su realizovali članovi sekcije Zidne novine.

Posjeta spomeniku kralja Tvrtka I Kotromanića

Povodom obilježavanja Dana krunisanja prvog bosanskog kralja Tvrtka I Kotromanića, članovi sekcije Kultura Bosne i Hercegovine su u četvrtak 26.10.2023. godine posjetili spomenik kralja Tvrtka, koji se nalazi u Gradskom parku u Tuzli. Održan je historijski čas, koji je bio posvećen našem prvom kralju, njegovim uspjesima na diplomatskom i vojnom planu, te o društvenim prilikama u Kraljevini Bosni u tom periodu. Stjepan Tvrtko I Kotromanić, posljednji je bosanski ban koji je vladao u periodu od 1353. do 1377. godine. Prvi je bosanski kralj koji je krunisan 1377. godine. Za vrijeme njegove vladavine ostvarena je politička stabilnost, kulturni i duhovni napredak, što ga je učinilo najjačim vladarem u historiji srednjovjekovne Bosne.

Medreslije se družili sa srednjoškolcima iz Srebrenika

Već drugu godinu učenici Mješovite srednje škole iz Srebrenika posjećuju Behram-begovu medresu. Tako je bilo i u četvrtak 26.10.2023. godine kada su nas zijaretili sa svojom profesoricom engleskog jezika Amelom Nurikić. Bila je ovo prilika za druženje i za sportsko nadmetanje. Nakon druženja, u kojem su učestvovali i članovi Medresinog hora i orkestra, uslijedilo je natjecanje u odbojci između učenica Medrese i gošći iz Srebrenika. Gošće su bile spretnije i odnijele su pobjedu. Potom je uslijedila muška utakmica u košarci. U njoj su naši momci odnijeli pobjedu. Uslijedit će i uzvratna posjeta učenika Medrese kraljevskom gradu, i prilika za stvaranje novih prijateljstava.

Direktor se susreo sa najuspješnijim učenicima

U petak 19.10.2023. godine sportašice Behram-begove medrese, koje su osvojile treće mjesto na sportskim susretima učenica srednjoškolskih ustanova Islamske zajednice u Bosni i Hercegovini, bile su na prijemu kod direktora Behram-begove medrese Ahmeda Hatunića. Prijem je upriličen 27.10.2023. godine i za učenike koji su u prošloj školskoj godini Behram-begovu medresu predstavljali

na takmičenjima i osvojili neko od prva tri mjesta. To su učenici: Jašić Husein, Baturić Lejla, Osmanbegović Dženita, Zoletić Fatima, Islamović Amel, Agić Esma, Huskanović Fatima, Ravkić Ajla i Zukić Nejra. Ovom prijemu su prisustvovali i najbolji učenici svih odjeljenja: Okanović Malik IIa, Hodžić Hamza IIb, Umihanić Emina IIc, Agić Esma IID, Sarajlić Selver IIIa, Lapandić Ahmed IIIb, Baturić Lejla IIIc, Hatunić Medina IIId, Jašić Husein IVa, Halilčević Faris IVb, Duraković Maida IVc i Huskanović Fatima IVd. Na prijemu su bili i Dizdarević Kanita učenica IVd koja je u prošloj školskoj godini proglašena najuspješnijim čitaocem i najuspješniji sportista u Behram-begovoj medresi za školsku 2022/23. godinu Imširović Ago, učenik IVa. Direktor Ahmed Hatunić je čestitao učenicima i zaželio im je uspjeh u narednom period. Prijemu su prisustvovali pomoćnik direktora za nastavu Fuad Imširović i mentori takmičara.

Prvi razred u posjeti prijestolnici

Generacija učenika prvog razreda Behram-begove medrese je u utorak 24.10.2023. godine boravila u Sarajevu. Bila je ovo prilika da posjete izložbu " *Pod nebom vedre vjere*"-Islam i Evropa u iskustvu Bosne. Riječ je o multimedijalnoj izložbi naučno-istraživačkog, edukativnog i izložbenog projekta, koja tematizira duhovno, kulturno, civilizacijsko, političko-pravno naslijeđe, kulturnu baštinu, umjetničke, arhitektonske, graditeljske, književne i muzičke duhovne izraze. Učenici su imali priliku vidjeti 1500 eksponata, više od 200 fotografija, etnološki materijal, više od 30 umjetničkih djela i nekoliko video snimaka koji su napravljeni na dvije stotine lokacija na prostoru Bosne i Hercegovine. Nakon toga su posjetili Gazi Husrev-begovu medresu i džamiju.

Učenice Medrese na panel diskusiji o pravosudnom sistemu

U Općinskom sudu u Tuzli 26. i 27. oktobra održana je središnja manifestacija obilježavanja Evropskog dana pravde pod nazivom „Transparentno i efikasno pravosuđe u službi građana“. Učenice Behram-begove medrese prisustvovala su četvrtoj panel diskusiji

pod nazivom „Upoznavanje učenika osnovnih i srednjih škola sa funkcionisanjem pravosudnog sistema i prevencija nasilja u porođici i vršnjačkog nasilja“. Cilj obilježavanja Evropskog dana pravde je pokušaj da se pravosudni sistem približi građanima, da se građani upoznaju sa svojim pravima, te da se pokuša vratiti povjerenje u transparentnost i efikasnost pravosudnih institucija.

Muhamed Jukan novi hafiz Behram-begove medrese

Pred Komisijom za polaganje hifza Rijaseta Islamske zajednice u Bosni i Hercegovini u ponedjeljak 30.10.2023. godine posljednje ajete je proučio Muhamed Jukan i time stekao časno zvanje hafiza Kur`ana Časnog. Muhamed Jukan je sin rahmetli Nermina i majke Fatime, rođen 2005. godine u Tuzli. Učenik je četvrtog razreda Behram-begove medrese. Uz sve obaveze koje zahtijeva hifz Muhamed je tokom svog školovanja u Medresi bio odličan učenik i učestvovao je na takmičenjima iz hemije. Muhafiz mu je hafiz Amir Hodžić, profesor u Behram-begovoj medresi.

Medresinih novih trideset godina

U prepunoj sali Bosanskog kulturnog centra u Tuzli u srijedu 1.11.2023. godine održana je svečana akademija povodom trideset godina od obnavljanja rada Behram-begove medrese pod nazivom *Obnovljena tradicija učenosti*. Direktor Behram-begove medrese Ahmed Hatunić se obratio i naglasio da je misija Behram-begove medrese spoj tradicije i modernosti, slijeđenje tradicionalnog sa svime što tradicija podrazumijeva za nas muslimane i u svom obraćanju podsjetio je na uspjehe koje je Medresa ostvarila u proteklom periodu i izrazio je sreću zbog velikog broja hafiza koje je naša škola iznjedrila u proteklih trideset godina. Obraćanje je imao i muftija tuzlanski Vahid-ef. Fazlović, koji je prenio čestitke od reis-ul-uleme Islamske zajednice u Bosni i Hercegovini Husein-ef. Kavazovića, istakao je da Behram-begova medresa kao prepoznatljiva luča znanja, morala i kulturnog uzdizanja i da ima velik značaj u našem vremenu. Muftija tuzlanski Vahid-ef. Fazlović je uručio Behram-begovoj medresi priznanje Muftijstva tuzlanskog

za doprinos odgoju i obrazovanju novih generacija imama i muallima, a koje je primio direktor Medrese Ahmed Hatunić. Obraćanje su imali i ministar obrazovanja i nauke Tuzlanskog kantona Ahmed Omerović i šef Odjela za osnovno i srednje obrazovanje u Upravi za obrazovanje i nauku Rijasetu Islamske zajednice u Bosni i Hercegovini Seid Eminović. Svečanosti su prisustvovali brojni prijatelji naše škole, vakifi, vjeroučitelji, roditelji, profesori i učenici.

Program je bio raznovrstan, a izveli su ga članovi hora i orkestra Behram-begove medrese, članovi dramske i recitatorske sekcije, a za ovu priliku je snimljen i kratki film koji nas je vratio u ratnu 1993. godinu. Posebni gosti programa bili su bivši učenici Medrese, poznati interpretator sevdalinki i sazlija Jusuf Brkić i interpretator ilahija Senad Kukuljević.

Prijem za prijatelje Medrese

Behram-begova medresa ovih dana obilježava trideset godina od obnove rada. U ratnom periodu kada je trebala pomoć, podrška nije izostala od velikog broja ljudi i institucija u periodu njene obnove i rada. Tim povodom u Behram-begovoj medresi upriličen je prijem za ranije predsjednike Tuzlanskog kantona, premijere i ministre obrazovanja u Vladi Tuzlanskog kantona, te gradonačelnike Tuzle. Prijemu je prisustvovao i reis-ul-ulema Islamske zajednice u Bosni i Hercegovini Husein-ef. Kavazović, direktor Behram-begove medrese Ahmed Hatunić i muftija tuzlanski Vahid-ef. Fazlović. Uz mnogobrojne zvanice prijemu je prisustvovao i ratni gradonačelnik Tuzle Selim Bešliagić i trenutni premijer Vlade Tuzlanskog kantona Irfan Halilagić. U znak zahvalnosti za doprinos njenoj obnovi i radu, gostima su uručene zahvalnice i primjerci Monografije Behram-begove medrese. Nastava u Behram-begovoj medresi je počela 6.10.1993. godine. Danas, trideset godina nakon početka njene obnove Behram-begova medresa je savremena odgojno-obrazovna ustavno sa razvijenom infrastrukturom i programima koji se kontinuirano unapređuju.

Medresin hor i orkestar gostovali u Zagrebu

Povodom obilježavanja trideset godina od osnivanja Islamske gimnazije dr. Ahmed Smajlović u Zagrebu u subotu 4.11.2023. godine održana je svečana akademija. Na ovoj svečanosti povodom velikog jubileja gostovao je hor i orkestar Behram-begove medrese. Oni su nastupili sa četiri numere. Akademiji su prisustvovala brojne zvanice, gosti i prijatelji, a među njima su bili i direktor Behram-begove medrese Ahmed Hatunić. Reis-ul-ulema Islamske zajednice u Bosni i Hercegovini Husein-ef. Kavazović istakao je važnost postojanja ove obrazovne institucije u Zagrebu. Direktor škole u periodu od 1996-2010. godine Murat Hadžismajlović se osvrnuo na period Agresije na Bosnu i Hercegovinu kada je veliki broj izbjeglica dolazio u Zagreb, te je istakao da je postojanje ovog centra bilo od velike važnosti u tom teškom vremenu. Odluka o osnivanju ove srednje škole donesena je 1992. godine, da bi s radom počela 1993. godine pod nazivom Zagrebačka medresa dr. Ahmed Smajlović. Do transformacije u opću Islamsku gimnaziju dr. Ahmed Smajlović došlo je 2007. godine. Ahmed Smajlović je bio teolog, univerzitetski profesor i vršilac raznih dužnosti i prvi doktor nauka u Islamskoj zajednici. Bavio se pisanjem i prevodjenjem na arapski jezik. Pokrenuo je časopis Islamska misao 1978. godine. Zbog njegovog velikog doprinosa u izgradnji Islamskog centra u Zagrebu Islamska gimnazija nosi njegovo ime.

Medresin hor na mevludu u Novoj Kasabi

U četvrtak 9.11.2023. godine u Musa Pašinoj džamiji u Novoj Kasabi proučen je mevlud. Mevlud su izveli članovi hora Behram-begove medrese. Predavanje je održao profesor Bekir Šabić, odgajatelj u Behram-begovoj medresi. U svom obraćanju je istakao važnost sjećanja na Poslanika Muhammeda a.s., te je naveo primjer njegovog suočavanja u teškim situacijama u poslaničkoj misiji, važnosti učenja salavata kao ibadeta, te je dao savjete učenicima u postizanju najplemenitijih vrlina. Programu su prisustvovali glavni imam Medžlisa Islamske zajednice Vlasenica Nurdin-ef. Grahić, učenici Edukativnog centra Nova Kasaba, nastavnici, roditelji i džematlije.

Do zdravlja zdravom hranom

U četvrtak 9.11.2023. godine učenice trećeg razreda su učestvovala u radionici o zdravoj ishrani koju je pripremila odgajateljica Senada Mehmedćehajić. Radionici je prisustvovao i pedagog u Behram-begovoj medresi Ramiz Nurikić. Učenice IIIc su pripremom ukusnih palačinki, smutija, zdravog pudinga i voćne salate ponudile alternativu nezdravim obrocima i grickalicama. Mogli su se čuti i savjeti o pripremi i korištenju orašastih plodova koji se mogu pronaći i kod nas. Radionica je jedna od planiranih aktivnosti koje će se u ovoj školskoj godini realizirati.

Književni razgovori s Fajkom Kadrićem

U srijedu 15.11.2023. godine u amfiteatru Behram-begove medrese učenici su imali priliku da se druže s poznatim i nagrađivanim bosanskohercegovačkim književnikom Fajkom Kadrićem. Na Književnim razgovorima o romanima *Udovičke zemlje* i *Šta su meni ptice* moderator je bio Ali Hasanović, profesor bosanskog jezika u Behram-begovoj medresi. O djelima ovoga pisca je govorio i književni teoretičar dr. Mirsad Kunić. U svom uzlaganju on se osvrnuo i na važnost učenja bosanskoga jezika i pisanja knjiga. Učenicima se obratio i sam književnik Fajko Kadrić. On je rekao da je istražujući o prošlosti Bosne naučio dosta o sebi i svojim precima. „Postoji dosta podataka koji nam nisu dostupni, ali ima i onih koji jesu i o kojima trebamo pisati i pričati. Ne smijemo pasti u zamku da smo žrtve, a da ne pričamo o našim vojnim uspjesima, o živim ljudima koji su bili spremni dati svoj život za Bosnu. Moramo djeci pričati o preživjelima i uzimati ih za uzor, oni su bili spremni ponuditi svoj život, ponuditi sebe, da bi zaštitili drugoga, to je vrhunski čin.“ Književnik Fajko Kadrić je nagrađivani pisac. Napisao je romane *Udovičke zemlje*, *Protokol posrnulih*, *Šta su meni ptice*, te dvije knjige pripovjedaka *Ko još pjeva dok umire*, *Ordijski mujezin*. Roman *Udovičke zemlje* dobitnik je nagrade Fondacije za izdavaštvo 2019. godine i Zlatno pero 2020. godine.

Održano predavanje o maloljetničkom prestupništvu

U srijedu 8.11.2023. godine učenici prvog razreda su prisustvovali predavanju koje je održao inspektor Elmin Husanović iz Uprave policije Ministarstva unutrašnjih poslova Tuzlanskog kantona iz Odsjeka za seksualne delikte, maloljetničku delinkvenciju i nasilje u porodici. Tema o kojoj je govorio je maloljetničko prestupništvo. Ovom prilikom inspektor Husanović upoznao je učenike sa krivično-pravnim aspektima maloljetničkog prestupništva i vršnjačkog nasilja. Također se u svom izlaganju osvrnuo na jako zanimljivu i aktuelnu temu koja govori o zaštiti djece i omladine u digitalnom okruženju.

Učenici iz Zavoda posjetili Medresu

Behram-begovu medresu su u četvrtak 9.11.2023. godine posjetili učenici iz Zavoda za odgoj i obrazovanje učenika sa smetnjama u psihičkom i tjelesnom razvoju iz Tuzle. U pratnji učenika su bili odgajatelji Ernestina Bekrić i Melis Koldžić. Učenici su obišli kompleks Medrese, internat, učionice, biblioteku, sportske terene i džamiju. Između Behram-begove medrese i Zavoda već dugo godina postoji dobra saradnja. Članovi naše volonterske sekcije su jedni od najaktivnijih u našoj školi i u poslijepodnevним satima volontiraju u Zavodu i druže se sa učenicima i pomažu im u izvršavanju školskih obaveza. Bila je ovo izuzetna prilika da i učenici iz Zavoda posjete našu školu i da se druže sa našim volonterima. Domaćin gostima je bio Ramiz Nurikić, pedagog u Behram-begovoj medresi i Esmā Rahmanović, učenica drugog razreda naše škole i jedna od najaktivnijih članova volonterske sekcije Behram-begove medrese.

Završeno prikupljanje zekata na poljoprivredne proizvode

U toku oktobra i prvoj polovini novembra ove godine realizovana je akcija prikupljanja zekata na poljoprivredne proizvode. Prikupljalo se brašno, grah, jabuka, krompir, kupus, med, paprike, patlidžani, suhe šljive i drugi poljoprivredni proizvodi. Sakupljeno

je namirnica u vrijednosti preko 26.000 KM. Medžlisi koji su prikupili zekat i prikupljene namirnice ustupili Medresi su medžlisi Gradačac, Srebrenik, Janja, Kalesija, Teočak i Banovići. Akcija prikupljanja zekata na poljoprivredne proizvode se realizuje svake godine i namirnice koje se prikupe se koriste za pripremu obroka u Behram-begovoj medresi za učenike naše škole.

Proučena hafiska dova Mustafi Sprečaku

U nedjelju 19.11.2023. godine u džematu Čarši-džamije u Tešnju proučena je hafiska dova Mustafi Sprečaku. Muhaffiz mu je bio hafiz Mirnes Spahić, profesor kiraeta u Behram-begovoj medresi. Hafiskoj dovi su prisustvovali izaslanik reisu-l-uleme Islamske zajednice u Bosni i Hercegovini hafiz Mensur Malkić, direktor Behram-begove medrese Ahmed Hatunić, imami, rodbina i prijatelji. Izaslanik reisu-l-uleme hafiz Mensur Malkić uručio je diplomu Kur`ana Časnog mladom hafizu Mustafi Sprečaku. Hafiz Mustafa Sprečak je sin Nedžada i Mirsade, rođen je 2001. godine u Tešnju. Osnovnu školu je završio u Jelahu, a Behram-begovu medresu u Tuzli 2020. godine. Studira na Fakultetu islamskih nauka u Sarajevu. On je peti hafiz iz 344. generacije Behram-begove medrese, a trideset i drugi poslijeratni tešanjski hafiz. Posljednje stranice Kur`ana Časnog proučio je napamet 30.10.2023. godine pred Komisijom za hifz Rijasetu Islamske zajednice u Bosni i Hercegovini.

Proučena hafiska dova Muhamedu Jukanu

U utorak 21.11.2023. godine u džamiji Behram-begove medrese proučena je hafiska dova Muhamedu Jukanu. Muhaffiz mu je bio hafiz Amir Hodžić, profesor u Behram-begovoj medresi. On je 99. hafiz Behram-begove medrese. Hafiskoj dovi su prisustvovali izaslanik reisu-l-uleme Islamske zajednice u Bosni i Hercegovini dr. Sead Seljubac, direktor Behram-begove medrese Ahmed Hatunić, pomoćnik direktora za nastavu u Behram-begovoj medresi Fuad Imširović, hafizi, profesori, učenici i učenice, rodbina i prijatelji. Izaslanik reisu-l-uleme dr. Sead Seljubac uručio je diplomu Kur`ana Časnog mladom hafizu Muhamedu Jukanu. Hafiz Muhamed Jukan

je sin rahmetli Nermina i Fatime, rođen je 2005. godine u Tuzli. Osnovnu školu je završio u Simin Hanu, a Behram-begovu medresu upisuje 2020. godine. U novembru iste godine počinje učiti hifz. Posljednje stranice Kur`ana Časnog proučio je napamet 30.10.2023. godine pred Komisijom za hifz Rijaseta Islamske zajednice u Bosni i Hercegovini. Maturant je u našoj školi i uz dosta obaveza koje iziskuje učenje hifza on je odličan učenik.

Obilježen Dan državnosti

Povodom 25. novembra Dana državnosti Bosne i Hercegovine u našoj školi je u srijedu 22.11.2023. godine održan svečani program. Program su izveli članovi hora i orkestra naše škole, i članovi recitatorske sekcije. Program se sastojao od izvođenja ilahija, sevdalinki i prigodnih recitacija. Predavanje je održao Muamer Zukić zastupnik u Skupštini Tuzlanskog Kantona i delegat u Domu naroda Federacije Bosne i Hercegovine. On se u svom izlaganju osvrnuo na pozitivne promjene u našoj domovini, na napredak i sve što smo uspjeli postići u godinama poslije Agresije. Podsjetio nas je na popise stanovništva u prošlom periodu, kada se nismo mogli izjasniti kao Bošnjaci. Također je napravio poveznicu Bosne sa Palestinom i njihovu želju da ostanu na svojoj zemlji, bez obzira na poteškoće sa kojima se susreću. Dan državnosti Bosne i Hercegovine je praznik koji se obilježava 25.11. jer je na taj dan 1943. godine, na prvom zasjedanju ZAVNOBiH-a u Mrkonjić Gradu usvojena Rezolucija kojom je izražena odlučnost naroda Bosne i Hercegovine da njihova zemlja bude zajednica u kojoj će svi narodi imati ista prava. Ovu odluku je izglasalo 247 vijećnika. Tog datuma je obnovljena državnost koja je izgubljena 1463. godine, kada je Bosna potpala pod upravu Osmanske imperije.

Maturantice na panel diskusiji u FINRA-i

Na Univerzitetu FINRA u Tuzli 21.11.2023. godine organizovana je panel diskusija za učenike koji su članovi sekcije liderstvo i poduzetništvo sa područja Tuzlanskog kantona. Govornici koji su učestvovali na panel diskusiji su profesori sa ovog Univerziteta,

prof. dr. Ismet Kalić, doc. dr. Edin Glogić, te mr. sc. Adem Azapagić. Nekadašnje studentice FINRA-e Melika Umihanić i Šejla Mandžić su vlasnice uspješnih firmi i govore su o svom iskustvu sa aspekta uspješnih poslovnih žena. Govornik na spomenutoj panel diskusiji bio je i gradonačelnik Tuzle dr. sc. Zijad Lugavić, koji je istakao važnost ženskog poduzetništva, te projekte podrške koje trenutno provodi grad Tuzla.

Nakon panel diskusije organizovan je kviz, na kojem su učenice Medrese osvojile treće mjesto i vrijednu nagradu.

Ova diskusija je organizovana povodom Međunarodnog dana ženskog poduzetništva, koji se obilježava 19. novembra, kako bi se naglasila uloga žene i njen doprinos u poslovnom svijetu. Na ovaj dan se održavaju razne manifestacije i okrugli stolovi na kojima se ističu različite perspektive i iskustva, koja doprinose inovacijama i održivom ekonomskom rastu.

Odojkaški turnir za Dan državnosti

U Behram-begovoj medresi je u četvrtak 23.11.2023. godine održan odbojkaški turnir za učenice povodom Dana državnosti Bosne i Hercegovine. Učestvovalo su četiri škole. Prvo mjesto je zauzela Srednja medicinska škola iz Tuzle, drugo mjesto su osvojile odbojkašice Građevinsko-geodetske škole iz Tuzle, a treće mjesto pripalo je učenicama Mješovite srednje škole iz Srebrenika. Behram-begova medresa je zauzela četvrto mjesto. Ovim turnirom za učenice i nizom drugih aktivnosti u našoj se školi obilježava osamdeset godina od zasjedanja ZAVNOBiH-a.

Učenici Medrese za Palestinu

Humanitarni bazar za Palestinu je održan u ponedjeljak 27.11.2023. godine u Behram-begovoj medresi. Prodavali su se kolači, smutiji, limunada, majice, ručno ukrašene šoljice, podmetači, razni ukrasni predmeti, privjesci sa motivima Palestine, slike, nakit, šalovi, mahrame i domaći proizvodi. Bazaru su se odazvali profesori, učenici, roditelji naših učenika želeći na ovaj način dati

svoj doprinos za narod Palestine. Prikupljena su sredstva u iznosu preko 9.000 KM. Sav prikupljeni novac će biti doniran za pomoć Palestini. U pripremi bazara su učestvovali članovi tri sekcije naše škole sa svojim profesorima, voditeljima sekcija: volonterska sekcija, humanitarna i sekcija kreativnih radova.

Promovisana knjiga "Novinarstvo digitalnog doba"

U Behram-begovoj medresi je u ponedjeljak 27.11.2023. godine održana promocija knjige *Novinarstvo digitalnog doba. Kako sačuvati profesiju?* autorice profesorice Amele Delić Aščić. Promotor je bio Sevret Mehmedčehajić, profesor bosanskog jezika i književnosti. On se u svom izlaganju osvrnuo na novinarstvo prije digitalnog doba. Podsjetio je na poznatog novinara Roy Gutmana, zahvaljujući čijem izvještavanju se čulo za logore kod Prijedora i kako je istinu koja je do tada postojala, on javno obznanio. Autorica Amela Delić Aščić se osvrnula na određene teme koje su obrađene u knjizi i dala kratak osvrt uporedivši određene događaje i njihov način plasiranja kroz medije. O knjizi je rekla da je ovo neophodno u naše vrijeme, posebno za mlade koji u vrtlogu velikog broja informacija, nisu uvijek u situaciji da ocijene koje su vijesti istinite i provjerene. Istakla je koliko je važno da imamo svoj glas koji će prenositi istinite informacije. Promociji su prisustvovali članovi novinarske sekcije Misak. Amela Delić Aščić je profesorica na Univerzitetu Filozofskog fakulteta Odsjek Žurnalistika u Tuzli. Ovaj knjiga je rezultat njenog doktorskog rada.

Takmičari na prijemu kod direktora Medrese

U srijedu 29.11.2023. godine održan je prijem kod direktora Behram-begove medrese Ahmeda Hatunića za učenike koji su učestvovali na takmičenjima iz bosanskog, arapskog i engleskog jezika. Ova takmičenja su održana u organizaciji Rijaseta Islamske zajednice u Bosni i Hercegovini. Prijemu su prisustvovali i mentori koji su pripremali učenike za takmičenje. Na nedavno održanim takmičenjima iz jezičkog područja naši učenici su osvojili ekipno drugo mjesto iz arapskog jezika, na takmičenju

iz bosanskog jezika zauzeli su također drugo mjesto i treće mjesto su osvojili iz engleskog jezika.

Volonteri i humanitarci na prijemu kod direktora

U ponedjeljak 4.12.2023. godine održan je prijem za članove volonterske, humanitarne i sekcije kreativnih radova. Prijemu su prisustvovali direktor Behram-begove medrese Ahmed Hatunić, pomoćnik direktora za nastavu Fuad Imširović i voditelji sekcija Ehlimana Suljić, Mersa Šabanović Ibišević, Zubejda Gobeljić i Smail Hašarić. Povod za ovaj susret je bio nedavno organizovani humanitarni bazar za Palestinu, koji je uspješno realizovan zahvaljujući podršci naših učenika, njihovih roditelja i uposlenika Medrese. Tada su učenici prodavali razne proizvode i ručne radove, a sav prikupljeni novac bit će usmjeren za pomoć narodu Palestine.

Učenici iz OŠ Centar u Medresi

U utorak 5.12.2023. godine u Behram-begovoj medresi su bili učenici devetog razreda Osnovne škole Centar iz Tuzle, s nastavnicom islamske vjeronauke Amrom Sinanović. Njima je domaćin bio pedagog u Medresi Ramiz Nurikić, koji ih je upoznao s nastavnim planom i programom u našoj školi i uslovima i organizaciji života u učeničkom domu. Ova posjeta je organizovana u sklopu aktivnosti koje pomažu učenicima u odabiru buduće profesionalne orijentacije.

Medresini volonteri posjetili Dom penzionera

U utorak 5.12.2023. godine volonteri naše škole posjetili su Dom penzionera u Tuzli. Bila je ovo prilika da na Međunarodni dan volontera, koji se obilježava 5. decembra, kroz druženje i razgovor pokažu brigu prema našim sugrađanima koji borave u ovoj ustanovi. Domaćin je bila Mirela Muminović, socijalni radnik u Domu penzionera.

Održano predavanje o oralnom zdravlju

Edukacija učenika prvog razreda o *Važnosti oralnog zdravlja i prevenciji karijesa* održana je u utorak 28.11.2023. godine u Behram-begovoj medresi. O oralnom zdravlju su govorili načelnica stomatološke službe Doma zdravlja u Tuzli dr. Mirjana Duspara i dr. Admir Brkičević, specijalista oralne medicine i parodontologije. Doktorica Duspara je pričala o karijesu, o uzrocima ove bolesti, njenom liječenju i o preventivnim koracima. Također se u svom izlaganju osvrnula na česta oboljenja zubne šupljine, ali je naglasila da se redovnom odlasku zubaru mnogi problemi mogu spriječiti. Dr. Admir Brkičević je govorio o pravilnom načinu čišćenja zubi, te je dao neke korisne savjete o pravilnoj higijeni zubi. Edukacija o oralnom zdravlju i higijeni koju provodi tim iz Doma zdravlja u Tuzli je već tradicionalna u našoj školi i traje od 2009. godine, a sljedeći korak jeste posjeta stomatološkoj službi Doma zdravlja.

Kuvajtski vakifi boravili u Medresi

U petak 8. decembra ove godine Behram-begovu medresu su posjetili šejh Nebil el-Avedi, izvršni direktor organizacije Nema iz Kuvajta, S'ad el-Utejbi, vakifa gospođa Esmā El-Harraz i članovi njene porodice. S njima je bio direktor Vakufske direkcije IZ-e u BiH Senaid Zajimović. S njima se susreo direktor Medrese Ahmed Hatunić sa svojim saradnicima i muftija tuzlanski Vahid-ef. Fazlović. Tokom posjete Behram-begovoj medresi, gostima je predstavljen rad ove škole i njeni najvažniji infrastrukturni projekti. Bila je ovo prilika da im se ukratko predstavi način rada škole, njena bogata tradicija i rezultati koje postiže u ovome vremenu. Goste su impresionirali podaci o broju učenika i alumnista, sadržaji koji su uključeni u nastavni proces i bogata javna i kulturna djelatnost škole.

Učenici i profesori Medrese na mirnoj šetnji Majki Srebrenice

U ponedjeljak 11.12.2023. godine održana je još jedna u nizu mirnih protestnih šetnji Majki Srebrenice na Trgu slobode u Tuzli.

Njima su se pridružili učenici trećeg i četvrtog razreda Behram-begove medrese, direktor naše škole Ahmed Hatunić, te profesori i odgajatelji. Nakon okupljanja na trgu i klanjanja podne-namaza u Čaršijskoj džamiji predali su hatme šehidima Srebrenice koje su ranije proučene. Majke Srebrenice su i ovog 11. decembra htjele da ukažu na sporu identifikaciju i sve teži pronalazak posmrtnih ostataka njihovih najmilijih. Svake godine sve je manje majki, koje su zbog bola za svojim najmilijim napustile ovaj svijet. Učešće učenika i profesora naše škole u njihovim protestima samo je mali znak podrške i saznanja da u svojoj boli nisu same.

U slavu naja

U Behram-begovoj medresi je u utorak 5.12.2023. godine održano *Veče naja*. Na večeri naja gosti su bili Mirsad Mrahorović, voditelj sekcije naja u našoj školi, Serhat Unger, poznati svirač naja iz Turske i Merzija Kasumović, koordinatorica sekcije. Učenici su imali priliku slušati izvedbe Serhata Ungera i Mirsada Mrahorovića, te naših učenika Mustafe Jukana i Ismihane Hadžić. Na kraju programa pogledali su i video u kojem su predstavljeni naši učenici, koji su bili članovi ove sekcije dok su išli u Medresu. Neki od njih studiraju u Turskoj i uče da sviraju na ovom neobičnom instrumentu. Instrument naj je star oko 4.000 godina, a u našu zemlju dolazi u 15. stoljeću. Naj spada u duhačke instrumente i napravljen je od trske.

Izašao 107. Misak

U ponedjeljak 11.12.2023. godine iz štampe je izašao 107. broj Misaka. Tema ovog broja su alumnisti Behram-begove medrese. U ovom broju intervjuirali smo nekadašnjeg učenika naše škole dr. Ahmeda Omerovića, ministra obrazovanja i nauke Tuzlanskog kantona. Također je razgovor obavljen sa još jednim alumnistom Mersedom Čamdžićem, vlasnikom uspješne firme Mistral Technologies. Tu su i stalne rubrike Ukrasi ahlaka, Čuvari Božije riječi, Poznate muslimanke, Drugi o Misaku, Naše sekcije, Preporuke za čitanje, Poezija i Vremeplov.

Mersiha Halilčević i Nadija Hodžić stipendisti Yes programa

Učenicice trećeg razreda Behram-begove medrese Mersiha Halilčević i Nadija Hodžić dobitnice su prestižne stipendije Kennedy-Lugar Youth Exchange and Study (YES) programa, koja im omogućava da školsku 2023/2024. godinu borave u Sjedinjenim Američkim Državama. Nadija Hodžić ide u školu Kingsburg High School u Kingsburgu u Kaliforniji. Mersiha Halilčević ide u školu Davenport Central High School u Davenportu, u saveznoj državi Iowa. U testiranju za ovu stipendiju je učestvovalo preko tri hiljade srednjoškolaca iz cijele Bosne i Hercegovine. Testiranje je organizirano u nekoliko krugova, a trajalo je od oktobra 2022. godine do aprila 2023. godine. Učenici su tokom ovog perioda radili razne testove i kvizove, pisali eseje i učestvovali u nekoliko intervjuja koji su trebali pokazati njihovo poznavanje engleskog jezika, komunikativnost, liderske vještine, interesovanja i opću zrelost učenika. Na kraju testiranja, dvadeset najboljih učenika iz naše zemlje je dobilo stipendiju i priliku da borave u Sjedinjenim Američkim Državama u ovoj školskoj godini. Testiranje organizira i realizira American Councils for International Education u Bosni i Hercegovini. Kennedy-Lugar Youth Exchange and Study je program kojim se stipendira jednogodišnja razmjena srednjoškolaca iz Bosne i Hercegovine i omogućava im da provedu jednu školsku godinu u Sjedinjenim Američkim Državama. Ovaj program je u potpunosti finansiran od strane Vlade SAD (State Department), a u Bosni i Hercegovini ga sprovodi American Councils for International Education od 2008. godine. Učenici koji dobiju stipendiju žive s volonterskim porodicama-domaćinima u Americi, tamo pohađaju srednju školu, volontiraju i učestvuju u vannastanim aktivnostima kako bi stekli liderske vještine, naučili više o američkom društvu i životu, te bili ponosni ambasadori svoje zemlje i kulture. Naše učenice Nadija Hodžić i Mersiha Halilčević su medresini 8. i 9. dobitnici ove stipendije. Ovu stipendiju su ranijih godina ostvarili i drugi naši učenici: Sead Joldić, Mirsad Hasić, Amina Merić, Velid Mujezinović, Hajra Smajić, Davud Hasanspahić i Ammar Ćidić.

Novinari Misaka kod novinara u Media centru

U utorak 19.12.2023. godine članovi školskog lista Misak boravili su u Sarajevu. Posjetili su Media centar Islamske zajednice gdje su ih dočekali Muamer Tinjak, direktor ove medijske kuće i urednički kolegij. O načinu funkcionisanja Media centra, te o izazovima sa kojima se susreću i organizaciji pričao je izvršni direktor programa Nedin Hrbat. On je ovom prilikom upoznao mlade novinare kako izgleda jedan radni dan na televiziji. Osvrnuo se na programski sadržaj, broj zaposlenih, te je pričao o planovima ove medijske kuće. Ovom prilikom obišli su radijski i televizijski studio, te redakciju gdje su imali priliku razgovarati sa poznatim novinarima ove televizije.

Tri bronzane i jedna srebrna plaketa za Medresu

Svečanost dodjele plaketa najboljim učenicima sa područja Tuzlanskog kantona za školsku 2022/2023. godinu, koje dodjeljuje Ministarstvo obrazovanja i nauke Tuzlanskog kantona i Pedagoški zavod TK održana je u četvrtak 21.12.2023. godine u Narodnom pozorištu u Tuzli. Bronzane plakete su dobili sljedeći učenici Behram-begove medrese: Baturić Lejla za osvojeno prvo mjesto na kantonalnom takmičenju iz fizike, Jašić Husein za osvojeno prvo mjesto na kantonalnom takmičenju iz matematike i fizike i srebrnu plaketu za osvojeno prvo mjesto na federalnom takmičenju iz fizike. Osmanbegović Dženita dobila je bronzanu plaketu za osvojeno prvo mjesto na kantonalnom nivou iz geografije.

Federalno priznanje za Behram-begovu medresu

Federalno ministarstvo obrazovanja i nauke dodijelilo je Behram-begovoj medresi priznanje za prepoznavanje, poticanje i usmjerenje talentovanih učenika. Svečana ceremonija dodjele priznanja održana je u Sarajevu 19.12.2023. godine. Federalna ministrica obrazovanja i nauke prof.dr. Jasna Duraković uručila je priznanja i jednokratne novčane nagrade za 59 najboljih učenika osnovnih i srednjih škola sa prostora Federacije Bosne i Hercegovine. Priznanje

i nagradu za izvanredne rezultate u nastavnim i vannastavnim aktivnostima dodijeljeno je učeniku četvrtog razreda Behram-begove medrese Huseinu Jašiću za postignute rezultate iz fizike i matematike, a učenici trećeg razreda Lejli Baturić za postignute rezultate iz fizike i historije u protekloj 2002/2023. godini.



Međunarodni Dan planina obilježen u Medresi

U Behram-begovoj medresi je u ponedjeljak 11.12.2023. godine organizovan program povodom obilježavanja Međunarodnog dana planina. Ovaj program je okupio više predavača iz Udruženja Eko zeleni Tuzlanskog kantona sa predsjednikom Udruženja prof. Muhamedom Omerovićem. Na obilježavanju Dana planina pored učenika naše škole učestvovali su i učenici Katoličkog školskog centra Opća gimnazija „Sveti Franjo“ iz Tuzle. Tema ovog ekološko-pedagoškog programa bila je *Naše planine-njihov značaj za čovjeka i očuvanja biodiverziteta*. Na ovom stručnom skupu učenici ekološko-botaničke sekcije Behram-begove medrese prezentovali su svoje referate o planinama u Bosni Hercegovini. Program je obuhvatao i sadnju parkovske biljke u dvorištu škole. Sadnicu biljke katalpa našoj školi uručilo je Udruženje Eko-zeleni Tuzlanskog kantona.

Održan kolokvij o hafizu dr. Salihu-ef. Sivčeviću

Povodom 80. godina od rođenja hfz. dr. Saliha-ef. Sivčevića u Behram-begovoj medresi je u četvrtak 21.12.2023. godine održan kolokvij *Hafiz dr. Salih-ef. Sivčević-Istaknuti alim i pedagog (1885-1943)*, povodom 80 godina od preseljenja na ahiret. Izlagači su bili dr. Sead Seljubac, hafiz Nedžad Vehabović, profesor u Behram-begovoj medresi i prof.dr. Izet Šabotić, profesor na Filozofskom fakultetu u Tuzli. Programu su prisustvovali direktor Behram-begove medrese Ahmed Hatunić i muftija tuzlanski Vahid-ef. Fazlović. Direktor Behram-begove medrese Ahmed Hatunić se osvrnuo na vrijeme kada hafiz Sivčević preuzima ulogu upravitelja u Behram-begovoj medresi; „Uloga dr. Sivčevića bila je izuzetno značajna u tom periodu, kada je rukovodio Behram-begovom medresom, koja je nakon nekoliko godina postala prepoznatljiva, respektabilna ustanova, ne samo u ovom dijelu Bosne, nego u čitavoj Bosni i Hercegovini.“ Muftija tuzlanski Vahid-ef. Fazlović se osvrnuo na njegov doprinos i viziju koju je imao u to vrijeme. „Ponosni smo na ovog velikog alima, organizatora i reformatora, koji nije puno pisao, ali je dosta radio i bio rukovodilac. Uložio je velike napore, te je tu svoju spoznaju pretočio u djelo.“ Hafiz Nedžad Vehabović se

u svom izlaganju prisjetio njegova života i djela. Njegov život je bio jako zanimljiv i pun izazova u tom teškom vremenu. „Postavljen je za upravitelja Medrese 1922. godine i odmah je pokazao upornost, znanje i savjesnost u obavljanju poslova koji su mu povjereni. Poseban akcenat je stavio na odgoj učenika. Od prvih dana je uveo obavezno obavljanje svih namaza u džematu.“ Dr. Sead Seljubac je govorio o temi „*Hafiz dr. Salih-ef. Sivčević i reforma Medrese*“ te je naglasio ulogu koju je imao kao reformator i naveo njegov doprinos. Naveo je da zaslužan za ukidanje individualne nastave i uvođenje razredne nastave u petogodišnjem trajanju, uveo je u medresu potrebnu školsku dokumentaciju i administraciju, te je postepeno uveo u nastavni program pored vjerskih i svjetovne predmete. Unaprijedio je internatski život učenika, zaslužan je za osnivanje dačke kuhinje, utvrđuje kućni red medrese i internata, uvodi prijemni ispit iz kiraaeta, i uvjetuje upis u Medresu završenom osnovnom školom u četverogodišnjem trajanju.“ Uveo je školske klupe, krevete u internat, red u internat, sobne pazitelje, te uvodi ferije (ljetni i zimski raspust), obogaćuje književni fond u biblioteci. Prof.dr. Izet Šabotić u svom izlaganju osvrnuo se na izuzetno teško vrijeme u kojem je djelovao. „Nakon Prvog svjetskog rata dolazi do otimačine imovine Bošnjaka i velikih zločina u mirnodobsko vrijeme. Osjećao se strah i velika neizvjesnost među Bošnjačkim stanovništvom. U to vrijeme siromaštva i velikih promjena na globalnom planu djelovao je uvaženi hafiz Sivčević. To su bile izuzetno teške godine, ali se on kao muderis i direktor izuzetno dobro snašao.“ Hafiz dr. Salih-ef. Sivčević rođen je 1885. godine u selu Vražići, kod Čelića. Dolazi iz zemljoradničke porodice. Završio je medresu u Brčkom. Godine 1903. odlazi u Istanbul na daljnje školovanje i uči pred čuvenim muderrisom hafizom Mehmedom Teufikom bin Mehmedom Sabitom. Nakon deset godina slušanja njegovih predmeta 1914. godine dobiva idžazetnamu kojom ga proglašavaju sposobnim za sva islamska vjerska znanja. To je ovjereno i od Ministarstva prosvjete Turske i Ministarstva za vanjske poslove. Upisuje se u reformiranu veliku teološku školu Daru-l-hilafe u Istanbulu i završava je 1918. godine i dobiva diplomu kojom se proglašava sposobnim za najveća islamska vjerska znanja. Godine 1918. nastavlja školovanje na Sulejmaniji, velikoj

reformiranoj školi za doktorat. Nakon trogodišnjeg školovanja postaje doktor teologije. U Bosnu se vraća 1922. godine gdje je postavljen za upravitelja Behram-begove medrese. Pred početak Drugog svjetskog rata teško je obolio i bolest mu se pogoršala kada je njemačka vojska zauzela Medresu 1943. godine i odnijela sve stvari i opremu. Bio je vezan za Behram-begovu medresu sve do smrti 29.3.1943. godine. Ukopan je u u tuzlanskom mezarju Borčić uz prisustvo velikog broja građana. O njegovom životu najviše govore njegova djela, a entuzijazam koji je posjedovao je i danas inspiracija novim generacijama kako se uz velik trud i zalaganje mogu i u teškim vremenima postići izuzetni rezultati.

Obilježen Svjetski dan arapskog jezika u Medresi

U ponedjeljak 18.12.2023. godine u našoj školi je obilježen Svjetski dan arapskog jezika. Učenice drugog razreda su pripremile panoe na temu Svjetski dan arapskog jezika. U srijedu 20.12.2023. godine učenici trećeg razreda koji prisustvuju izbornoj nastavi iz arapskog jezika su učenicima naše škole podijelili slatkiše sa porukama, koje govore o važnosti učenja arapskog jezika. Povodom ovog značajnog dana polaznici kursa arapskog jezika su sa profesorom arapskog jezika u Medresi, Kemalom Jusufovićem u utorak 19.12.2023. godine posjetili Specijalnu biblioteku Behram-beg. Prigodnim predavanjem o arapskom jeziku obratio se bibliotekar Jusuf Džafić. U srijedu 20.12.2023. godine u Medicinskoj školi upriličen je program kojem je prisustvovala grupa učenika četvrtog razreda sa profesorom Kemalom Jusufovićem. Program su pripremili učenici ove škole, a povodom Svjetskog dana arapskog jezika. Arapski jezik je šesti službeni jezik organizacije Ujedinjenih nacija. Ovo je jezik Kur`ana, posljednje Božije objave. Muslimani se u namazu mole Allahu dž.š. na arapskom jeziku. Govori ga više od dvije stotine miliona ljudi širom svijeta. Tokom srednjeg vijeka arapski jezik je bio glavni jezik kulture i nauke.

Behram-begova medresa druga na vrednovanju gimnazija Tuzlanskog kantona

Pedagoški zavod Tuzlanskog kantona na svojoj zvaničnoj web stranici objavio je konačnu listu najbolje rangiranih srednjih škola sa područja Tuzlanskog kantona za 2022/23. godinu. U rangu gimnazija drugo mjesto je zauzela Behram-begova medresa sa osvojenih 3682 boda. Na prvom mjestu je Gimnazija Meša Selimović iz Tuzle sa osvojenih 4118 bodova. I na trećem mjestu je Gimnazija Živinice sa osvojenih 3083 bodova. Vrednovanje svih srednjih škola na području Tuzlanskog kantona vršili su zaposlenici Pedagoškog zavoda Tuzlanskog kantona po instrumentariju Zavoda.

Predstavnici tuzlanskog Medžlisa posjetili Medresu

U ponedjeljak 25.12.2023. godine u Behram-begovoj medresi su boravili predstavnici Medžlisa Islamske zajednice Tuzla. Posjeta je upriličena povodom 30 godina od obnavljanja rada Behram-begove medrese. Direktor Behram-begove medrese dr. Ahmed Hatunić, sa svojim pomoćnicima Fuadom Imširovićem, Mehmedalijom Čandićem i sekretarom Sevretom Mehmedčehajićem ugostio je predsjednika Izvršnog odbora dr. Amira Karića, glavnog imama hfz. Ahmeda-ef. Huskanovića i sekretara Medžlisa IZ-e Tuzla Mersada Pašića. Saradnja Medžlisa Islamske zajednice Tuzla i Behram-begove medrese je kontinuirana i ona će se nastaviti i u narednom periodu.

Počeo zimski raspust

U petak, 29.12.2023. godine u Behram-begovoj medresi je završeno prvo polugodište u ovoj školskoj godini. Drugo polugodište počinje 15.01.2024. godine, kada se učenici vraćaju u školu i pripremaju za nove školske obaveze. Nastavna 2023/24. godina završava polovinom juna.



Istanbulska ministrica Hale Uzbaš u posjeti Tuzli

U našem gradu je u periodu od 29.12.2023. godine do 1.1.2024. godine boravila ministrica za obrazovanje općine Sandžak Tepe iz Istanbula Hale Uzbaš, sa svojim pomoćnicima i profesorima iz pobratimskih škola Behram-begove medrese iz ove općine. Direktor Medrese dr. Ahmed Hatunić dočekaio je goste sa svojim saradnicima Fuadom Imširovićem i Sevretom Mehmedčehajićem. Dočeku je prisustvovao i muftija tuzlanski Vahid-ef. Fazlović, koji je istakao važnost ovakvih posjeta i njegovanja dobrih veza između ova dva muslimanska naroda. U subotu 30.12.2023. godine gosti su obišli kompleks Medrese i nakon toga posjetili Medžlis Islamske zajednice Tuzla, gdje ih je primio glavni imam hafiz Ahmed-ef. Huskanović. Domaćin se zahvalio na dobroj saradnji s profesorima iz medrese Aziz Bajraktar u Istanbulu, koji svake godine dovedu vrsne učeće Kurana na Večer Kurana u Tuzli. Nakon Medžlisa uslijedila je posjeta Biblioteci Behram-beg i Institutu za društvena i religijska istraživanja. Direktor Instituta dr. Šefko Sulejmanović je predstavio rad Instituta i dosadašnje projekte, a Biblioteku Behram-beg njen direktor Admir Muratović. Pričao je o knjižnom fondu i o historijatu ove ustanove. Ministrica Uzbaš se susrela i s ministrom obrazovanja i nauke Tuzlanskog katona dr. Ahmedom Omerovićem. Obostrano je iskazana želja za unapređenjem saradnje između ovih dvaju ministarstava, prije svega u podršci učenju turskog jezika u školama na području našeg kantona i pomoći učenicima sa smetnjama u razvoju, kao i učenju bosanskog jezika u školama u Istanbulu. Ministrica Uzbaš je u nedjelju 31.12.2023. godine posjetila Memorijalni centar Potočari Srebrenica. Istu večer prisustvovala i Večeri Kur'ana u džamiji Kralj Abdullah u Tuzli.

Medresi dodijeljeno priznanje za doprinos izučavanju Kur'ana

U nedjelju 31.12.2023. godine u Džamiji Kralj Abdullah u Tuzli održana je tradicionalna večer Kur'ana. U toku programa dodjeljuje je priznanje za doprinos izučavanju Kur'ana i kur'anskih nauka. Ta tradicija traje 14 godina. Ovogodišnje priznanje i nagrada

dodijeljeni su Behram-begovoj medresi, a direktoru Medrese dr. Ahmedu Hatuniću uručio ih je muftija tuzlanski Vahid-ef. Fazlović. Tokom ceremonije primanja priznanja, direktor Hatunić je kazao da se ono odnosi na rezultate postignute u učenju i proučavanju Kur`ana u ovoj školi. Istakao je da misija Behram-begove medrese jako važna za naš narod. Muftija tuzlanski Vahid-ef. Fazlović je naglasio da se odaje priznanje svim muderrisima ove škole, na čelu s direktorom dr. Ahmedom Hatunićem. Također je kazao da smo svi ponosni na hafize, kojih će u okviru sekcije za hifz Behram-begove medrese, uskoro biti preko stotinu. Od reaktiviranja rada 1993. godine pa sve do danas u Medresi se ulažu naponi na poboljšanje prostornih i organizacijskih uvjeta za ostvarenje što kvalitetnijih odgojno-obrazovnih rezultata. Tome svjedoče uspjesi učenika na kantonalnom i državnom nivou. U okviru Nastavnog plana i programa Behram-begove medrese kur`anski principi su utkani u sve vjerske predmete, a postoji poseban predmet tefsir i sekcija hifza, koji dodatno daju mogućnost proučavanja Kur`ana i širenja njegove poruke među učenicima. Od 1993. godine pa do danas iz Medrese je izašlo 99 hafiza. Priznanje i nagrada su ustanovljeni od strane Izvršnog odbora Medžlisa Islamske zajednice Tuzla.

Priznanja najboljim školama

U petak 19. januara ove godine u Pedagoškom zavodu Tuzlanskog kantona dodijeljena su priznanja najboljim školama u školskoj 2022/23. godini. Podsjetimo, vrednovanje svih škola na području TK provodi Pedagoški zavod po jedinstvenom instrumentariju. Vrednovanje je provedeno tokom oktobra i novembra, a rezultati su objavljeni krajem 2023. godine. Behram-begova medresa je u rangu gimnazija zauzela drugo mjesto. Priznanje je u ime škole primio mr. Fuad Imširović, pomoćnik direktora za nastavu.

Kamp srednjoškolaca o poslovnim idejama

Dvodnevni kamp iz oblasti poduzetništva realizovan je 21. i 22. januara 2024. godine u Medresi Osman-ef. Redžović u Velikom Čajnom kod Visokog. Kampu su prisustvovali učenici iz

bosanskohercegovačkih medresa i drugih srednjih škola. Predavači su bili dr. Mohammad Alsagher i dr. Mir Dost, univerzitetski profesori iz Velike Britanije sa akademskim iskustvom iz poduzetništva. Našu medresu su predstavljale Kanita Dizdarević, učenica četvrtog razreda, Melika Šestan i Anesa Balić, učenice drugog razreda. U ova dva dana održana su predavanja i vježbe koje će polaznicima kampa u budućnosti pomoći u osmišljavanju poslovnih ideja. Također su formirani timovi i svaki od njih je imao zadatak da razvije svoju originalnu poslovnu ideju i uvjeri članove komisije da je njihova poslovna ideja vrijedna investiranja. Tim u kojem su bile učenice Behram-begove medrese osvojio je drugo mjesto i vrijednu novčanu nagradu. Kamp je organizovan u saradnji sa International Waqf Fund Birmingham iz Engleske.

Izašao novi broj Misaka

Iz štampe je izašao 108. broj školskog lista Misak. Tema ovog broja je trideset godina od obnove rada Behram-begove medrese. Dio atmosfere sa programa koji je izveden u Bosanskom kulturnom centru u Tuzli prenešen je na stranice Misaka. Povodom ovog velikog jubileja obavljen je intervju sa prvim direktorom Behram-begove medrese, a sadašnjim muftijom tuzlanskim Vahid-ef. Fazlovićem. Za 108. broj Misaka alumnisti prve generacije Medrese i profesori koji su predavali u našoj školi prisjetili su se medresinih početaka. Tu su i stalne rubrike Posljednja objava, Naši talenti, Čuvari Božije riječi, Vakifi, Sport, Reportaža iz Istanbula, Mahale.

Hadžimejlić održao predavanje i radionicu o kaligrafiji

U ponedjeljak 29.01.2024. godine u Behram-begovoj medresi je boravio poznati kaligraf i historičar umjetnosti Abdulhak Hadžimejlić. Pričao je o kaligrafiji na temu *Arapska kaligrafija-ocean najdivnijih linija*. Predavanju su prisustvovali članovi sekcije Kreativnih radova naše škole i učenici Građevinsko-geodetske škole iz Tuzle. Nakon predavanja održana je radionica na kojoj su učenici imali priliku da uče o osnovnim vještinama ovog posebnog umjetničkog izražaja arapskog pisma. Kaligrafija je umjetnost pisanja

rukom pomoću pera, kista ili nekog drugog pribora za pisanje. Tekstovi kaligrafskih ispisa su kur`anski ajeti, hadisi, ili neki drugi tekstovi i izreke. Postoji nekoliko vrsta pisama koji se koriste za kaligrafsko pismo; neshi, kufi, sulus, talik i divani. Abdulhak Hadžimejlić je studirao na Univerzitetu Selcuk u Konyi. Danas poučava kaligrafiji polaznike kursa na Akademiji Berise u Sarajevu.

Održana konferencija o poduzetništvu

U utorak 23.1. 2024. godine Behram-begova medresa bila je domaćin konferencije za voditelje sekcija poduzetništva u srednjim školama u Bosni i Hercegovini, koje učestvuju u programu Future Entrepreneurs of the World (FEW BiH), Budući poduzetnici svijeta. Na konferenciji se razgovaralo o aktivnostima sekcija, s posebnim osvrtom na takmičenje i pisanje poslovnih planova. Gost na konferenciji je bila Jasmina Gobeljić Dedić, direktorica Centra za edukaciju i istraživanje NAHLA iz Tuzle, koja je održala predavanje na temu *Utjecaj profesora na kreiranje poduzetničkog razmišljanja i proaktivnog djelovanja učenika*. Putem video linka prisutnima se obratio prof. Andrew Balas, predsjednik fondacije Forerunner Federation i inicijator programa Future Entrepreneurs of the World. Koordinatorica programa Future Entrepreneurs of the World u Bosni i Hercegovini je profesorica engleskog jezika u Behram-begovoj medresi Amila Hasanspahić. Program Future Entrepreneurs of the World je program dizajniran za učenike srednjih škola u Bosni i Hercegovini. Ovaj program je usmjeren ka razvijanju leaderskih i poduzetničkih vještina kod srednjoškolaca. Ovu inicijativu podržava Fondacija Forerunner Federation iz Sjedinjenih Američkih Država.

Saradnja Medrese i Bosanskog kulturnog centra iz Kalesije

U srijedu 31.01.2024. godine direktor Behram-begove medrese dr. Ahmed Hatunić sastao se sa Fahrudinom Sinanovićem, direktorom Bosanskog kulturnog centra Alija Izetbegović iz Kalesije. Dogovorena je saradnja o softveru za biblioteke koji je u primjeni u našoj biblioteci. Nakon toga obišli su školsku biblioteku, a o

bibliotečkom fondu i o iskustvu rada sa softverom za biblioteke razgovarali su sa Rijadom Šestanom, bibliotekarom naše škole. Saradnja između Behram-begove medrese i BKC-a iz Kalesije će se razvijati i u narednom periodu.

Učenici 4b pobjednici školskog takmičenja iz Projekta građanin

Školsko takmičenje iz Projekta građanin održano je 29. januara 2024. godine u Behram-begovoj medresi. Svake godine učenici četvrtog razreda obrade nekoliko tema iz predmeta Demokratija i ljudska prava kao pripremu za gradsko takmičenje. Nakon višemjesečnog istraživanja i rada predstavili su se sa aktuelnim temama u našem društvu. *Sa temom Pokušajte zatvoriti oči i probajte hodati, predstavili se učenici 4a. O Zakonskoj regulaciji električnih romobila istraživali su učenici 4b. Zaštita mentalnog zdravlja mladih bila je tema koju su predstavile učenice 4c i Reci ne plastičnim vrećicama, bio je zadatak za učenice 4d.* Nakon glasanja komisije odlučeno je da će Medresu na gradskom takmičenju iz Projekta građanin predstavljati učenici 4b sa temom *Zakonska regulacija električnih romobila.*

Kolokvij o Šabanu-ef. Hodžiću

U ponedjeljak 5.2.2024. godine u Behram-begovoj medresi je održan kolokvij *Život i djelo Šaban-ef. Hodžića* povodom 120 godina rođenja. O njegovom životu govorio je direktor Behram-begove medrese dr. Ahmed Hatunić. Istakao je da je poznati alim Šaban-ef. Hodžić rođen u selu Bokavići, kod Lukavca. Njegovo školovanje počinje u ruždiji, zatim se nastavlja u okružnoj Medresi. Upisuje sudačku školu, i nakon toga školovanje nastavlja u dalekom Egiptu na prestižnom Al-Azharu. Radio je u više gradova u Bosni i Hercegovini i na raznim poslovima. Osvrt na djela Šabana-ef. Hodžića izložio je dr. Mensur Husić, rukovodilac Službe za vjerske poslove i obrazovanje Muftijstva tuzlanskog. O popularizaciji arhivske građe i njegovom doprinosu arhivu govorio je mr. Omer Zulić, direktor Arhiva Tuzlanskog kantona. „Njegov doprinos je bio ogroman i za današnje okvire. Također je alarmirao i građane da donesu građu

u arhiv. U novinama Front slobode u članku koji je izašao 1955. godine on pokušava uticati na svijest ljudi u svrhu zaštite arhivske građe.“ O njegovim radovima objavljenim u Glasniku govorio je doc.dr. Šefko Sulejmanović, direktor Instituta za društvena i religijska istraživanja. „Teme kojima se bavio su izuzetno raznolike, od teološko-dogmatskih do sociopolitičkih. Bio je intelektualac otvorenog uma i profinjene kulture. Istakao je dr. Sulejmanović. Na kraju kolokvija obratio se muftija tuzlanski Vahid-ef. Fazlović. On je istakao da nam je Šaban-ef. Hodžić pokazao važnost očuvanja naslijeđa. *Uspostavio je arhiv i uspio je da islamske istine pomiri sa savremenim horizontima razumijevanja. Imao je i reformatorske tonove, i podsticao je muslimane na čvrstu vjeru i razumijevanje vjere, te oslanjanje na Allaha dž.š. Njegova djela su se uvijek bavila aktuelnim temama u društvu.* Profesor Šaban Hodžić rođen je u Bokavićima kod Lukavca 1903. godine. Obrazovao se u tuzlanskoj ruždiji, Behram-begovoj medresi, Šerijatskoj sudačkoj školi u Sarajevu i na Al-Azharu u Kairu. Većinu radnog vijeka proveo je kao profesor u našim medresama i gimnazijama, te najvišim islamskim školama. Kasne godine svog života proveo je u ustanovama kulture, u Zavičajnom muzeju u Tuzli i Tuzlanskom arhivu. Umro je i ukopan je u Tuzli 1980. godine.

Radionicom o sigurnosti u saobraćaju

U srijedu 14. februaru 2024. godine održana je edukativna radionica o važnosti zakonske regulacije električnih romobila u Bosni i Hercegovini. U pripremi ove radionice učestvovali su učenici IVb odjeljenja naše škole. To je jedna od nekoliko aktivnosti koje su ovi učenici realizovali pripremajući se za gradsko takmičenje iz Projekta građanin. U realizaciji radionice su učestvovali i učenici Građevinsko-geodetske škole, Srednje ekonomsko-trgovinske škole i Elektrotehničke škole iz Tuzle. Cilj radionice je bio jačanje svijesti o potrebi zakonske regulacije ovih prijevoznih sredstava kako bi se osigurala sigurnost svih učesnika u saobraćaju.

Humanisti se družili sa korisnicima Centra Koraci nade

U četvrtak 15.02.2024. godine članovi sekcije Klub humanista Behram-begove medrese posjetili su dnevni centar za djecu sa višestrukim smetnjama Koraci nade u Tuzli. Obišli su prostorije i upoznali su se sa radom ovog Centra. Domaćin je bila Selma Peštalić, program menadžer Centra Koraci nade. Družili su se sa korisnicima ovog centra i izveli program, proučili su nekoliko ilahija izmamivši osmijeh na lica mališanima koji su bili sa njima. Saradnja između Medrese i Centra Koraci nade traje nekoliko godina i ovo veliko prijateljstvo će se razvijati i u narednom periodu.

Debata o mentalnom i fizičkom zdravlju učenika

U četvrtak 15.2.2024. godine u Behram-begovoj medresi je održana debata na temu *U Behram-begovoj medresi se podjednako vodi računa i o mentalnom i o fizičkom zdravlju*. U afirmacijskom timu članovi su bili Fatima Huskanović, Selver Pašić i Lamija Jakubović. Oni su zastupali tezu da Medresa vodi računa o mentalnom i fizičkom zdravlju učenika. U negacijskom timu su bili učenici Selver Sarajlić, Melika Šestan i Elmina Hanić. Oni su zastupali tezu da Medresa ne vodi dovoljno računa o mentalnom i fizičkom zdravlju učenika. Oba tima su izložila argumente koji su potkrijepljeni dokazima, kako bi potvrdili svoju tezu. Na kraju debate komisija je odlučila da je pobjednički tim afirmacijski, jer je iznio više dokaza i bolje obrazložio svoju tezu. Ovo je bila aktivnost koja se organizuje jednom u toku školske godine, a koju organizuju članovi debatne sekcije Behram-begove medrese.

Radio sekcija o Danu maternjeg jezika

U nedjelju, 18. februara 2024. godine, Radio sekcija Behram-begove medrese pripremila je emisiju na Radio BIR-u povodom 21. februara, Dana maternjeg jezika. U pripremi emisije učestvovala su: Medina Tursunović, Lamija Hadžić, Lamija Baćevac, Merjem Mešić, Amina Okić i Dalila Omić. U emisiji se govorilo o književnosti

sa osvrtnom na naše najpoznatije književnike koji su njegovali bosanski jezik u svojim djelima. Spomenut je Zija Dizdarević i pročitana je odlomak iz njegove pripovjetke *Majka*. Od 2000. godine u svijetu se, u skladu sa zaključkom UNESCO-a, obilježava 21. februar kao Dan maternjeg jezika, koji je dio kulturnog identiteta naroda, tačka prepoznavanja, različitosti, ali i tolerancije i razumijevanja. Briga o maternjem jeziku je način dokazivanja svijesti o vlastitom identitetu, ali i veoma osjetljivo mjesto tolerancije prema drugom i drugačijem. Cilj obilježavanja Međunarodnog dana maternjeg jezika je unapređivanje, učenje i razvoj maternjeg jezika i njegovanje jezičke i kulturne različitosti i višejezičnosti. U UNESCO-vom dokumentu iz 1970. godine se kaže: „Maternji jezik označava put ljudskog bića i pomoću njega ono ulazi u društvo, čini svojom kulturu grupe kojoj pripada i postavlja temelje razvoju svojih intelektualnih sposobnosti.“ Generalna skupština UNESCO proklamirala je 1999. godine Dan maternjeg jezika, kao sjećanje na studente koji su 21. februara 1952. godine ubijeni u Daki u Istočnom Pakistanu, danas Bangladešu, jer su protestovali zbog toga što njihov maternji jezik nije proglašen zvaničnim jezikom. U svijetu danas postoji oko sedam hiljada različitih jezika.

Izvedena drama *Na Božijem putu* Ahmeda Muradbegovića

U prepunoj fiskulturnoj sali Behram-begove medrese u četvrtak 22.02.2024. godine članovi Dramskog studija Behram-begove medrese uspješno su izveli dramu *Na Božijem putu* autora Ahmeda Muradbegovića. Učenici su izvrsno odglumili zahtjevne uloge u drami: Selver Sarajlić u ulozi Bega i Lamija Bačević u ulozi Lejle, Haso Imširović kao Ćamil-beg Kusturica, Lejla Ćasurović u ulozi Hanume, Tarik Husić, Sulejman Husejnović, Lejla Hodžić i Tahira Deari kao sinovi i snahe, Amina Alibašić i Emina Nurikić kao djevojke u kući i Srđan Hodžić kao sluga Hasan. Učenike je pripremala njihova profesorica Bosanskog jezika u Behram-begovoj medresi Emina Hatunić. Nakon višemjesečnih priprema ova drama u tri čina izvedena je na oduševljenje publike. Izvedbi drame prisustvovali su učenici i profesori Behram-begove medrese.

Hemičari na Prirodno-matematičkom fakultetu

U utorak 20.02.2024 učenici trećeg i četvrtog razreda, koji idu na izbornu nastavu iz predmeta hemija posjetili su Prirodno-matematički fakultet u Tuzli. Voditeljica Odsjeka hemija, dr.sc. Aldina Kesić zajedno sa svojim asistentima obratila se učenicima, a mr.sc. Mirza Tupajić viši laborant, demonstrirao je izvođenje vježbi. Učenici su obišli laboratorij opće i neorganske hemije, te su prisustvovali izvođenju većeg broja eksperimentalnih vježbi, i nakon toga su samostalno uradili neke vježbe. Bila je ovo izuzetna prilika da učenici primijene stečena teoretska znanja, i da kroz praktičnu primjenu ovladaju znanjima i vještinama.

Hemičari i biolozi u Solani

Učenici koji idu na izbornu nastavu iz hemije i biologije u sklopu redovne terenske nastave u četvrtak 15.2.2024. godine posjetili su fabriku soli „Solana d.d. Tuzla“. Učenicima se obratila Ema Obralić i upoznala ih je sa historijatom ove fabrike, sa procesom proizvodnje kuhinjske soli kao i drugih proizvoda koje fabrika plasira na tržište kao što su tabletirana, dijetalna, industrijska, kuhinjska i stočna so, začini i destilovana voda. Nakon toga, učenici su obišli laboratorij kontrole proizvoda, gdje su mogli pogledati izvode kontrole i jodiranje soli. Solana je osnovana 1885. godine i kroz dugu industrijsku tradiciju uvijek zauzimala leadersku poziciju u ovom dijelu Evrope, te se nametnula kao ključni proizvođač soli na tržištu.

Predavanje o Prvoj pomoći u internatu

Edukativno predavanje na temu *Prva pomoć u internatu* održano je u četvrtak 22.02.2024. godine u amfiteatru Behram-begove medrese. O ovoj temi govorila je Melika Delić, studentica sa Odsjeka za zdravstvene studije na Medicinskom fakultetu u Tuzli. Ona se osvrnula na načešće ozljede koje se dešavaju, a koje se mogu prepoznati, a bol smanjiti uz odgovarajuću edukaciju i poznavanje osnovnih simptoma povreda. Presentacija se sastojala od šest tema: *Kako pružiti prvu pomoć? Šta trebamo imati kod*

sebe? Nesvjestica i gušenje, Temperatura i povraćanje, Rane, prelomi, iščašenja, opekotine i Ostale povrede. Predavanju su prisustvovala učenice naše škole.

Izložba povod Dana nezavisnosti: Tamo je nebo plavetno sjajem se preljeva

Povodom 1.marta Dana nezavisnosti Bosne i Hercegovine, u našoj školi je u srijedu 28.02.2024. godine otvorena izložba *Tamo je nebo plavetno sjajem se preljeva*. Izložbu je otvorio pomoćnik direktora za nastavu u Behram-begovoj medresi Fuad Imširović. Na pripremi ove izložbe radila je grupa učenika, polaznika kursa digitalnih multimedija u našoj školi: Belkisa Mehmedović, Temra Halilović, Emina Husić, Selver Pašić, Amina Pekarić i Nejra Nuričić. Medresini mladi fotografi snimili su neka od najljepših mjesta u Bosni i objektivima foto-aparata prikazali su svoje doživljaje domovine. Ova izložba broji 34 fotografije iz Gradačca, Srebrenika, Tuzle, Zvornika i Šija (Tešanj). Mentorstvo izložbe potpisuje profesor Robert Andrejaš, član Asocijacije za umjetničku fotografiju u Bosni i Hercegovini i kandidat majstora fotografije, voditelj kursa digitalnih medija u Medresi. A koordinator ove izložbe je Senada Mehmedćehajić.

Obilježen Dan nezavisnosti Bosne i Hercegovine

Program povodom Dana nezavisnosti Bosne i Hercegovine održan je u srijedu 28.02.2024. godine. Program se sastojao od izvođenja ilahija i recitacija. U programu su učestvovali članovi hora i orkestra Behram-begove medrese, te članovi recitatorske sekcije. Izvedena je drama *Ilhamijin put u smrt*, koju su pripremili članovi dramske sekcije pod mentorstvom profesorice bosanskog jezika u našoj školi Emine Hatunić. Predavač je bio novinar i publicista Hamza Ridžal. On se osvrnuo na svoja putovanja, koja je opisao u putopisu *Put svile* i na Bošnjake koje je sreo na ovim putovanjima. Govorio je o bosanskom jeziku koji su oni sačuvali i koji njeguju, iako desetljećima izbivaju iz svoje domovine. Njihova čežnja za domovinom je još uvijek velika, iako su je davno

napustili. Zaključio je da Bošnjaci trebaju biti ponosni na svoju kulturu, jer su joj korijeni jako duboki.

Pedramazansko obraćanje muftije Vahid-ef. Fazlovića

U utorak 5.3.2024. godine u džamiji naše škole učenicima Behram-begove medrese se obratio muftija tuzlanski Vahid-ef. Fazlović povodom nastupajućeg mjeseca ramazana. Nakon toga prisustvovao je i sjednici Nastavničkog vijeća obrativši se profesorima Behram-begove medrese. Istakao je da je u Medresi uvijek dinamično i da uvijek ima više angažmana, a tako će biti i u mjesecu ramazanu. Naglasio je da nema ništa toliko značajno kao što je ramazan, jer je u njemu Allahova milost i oprost. Također se u svom obraćanju osvrnuo na potrebu školovanja učenika koji će se usmjeriti da rade imamski poziv.

Medresini poduzetnici u Gradačcu

Članovi sekcije Liderstvo i poduzetništvo su u utorak 27.2.2024. godine posjetili Gimnaziju „Mustafa Novalić“ iz Gradačca. Učenicima se obratio direktor Gimnazije prof. Mirsad Djedović i prof. Maida Hujdur, voditeljica sekcije. Nejla Pandžić, učenica četvrtog razreda Gimnazije Mustafa Novalić, održala je prezentaciju o aktivnostima sekcije, kao i o uspjesima na proteklim takmičenjima u izradi poslovnih planova. Nakon posjete Gimnaziji realizovan je i susret sa lokalnim poduzetnicima, sa Indirom Halilović, direktoricom firme Zemax d.o.o. i sa dr. Esmom Bilajac, koja je predstavljala firmu Ammar d.o.o. Program Budući poduzetnici svijeta realiziran je uz podršku američke fondacija Forerunner Federation.

Promovisana zbirka poezije Kuća koja teče

U Behram-begovoj medresi su u četvrtak 7.3.2024. godine održani Književni razgovori, na kojima je promovirana zbirka poezije Kuća koja teče, autora Huseina Haskovića. Kako je istaknuto, u ovoj su knjizi sabrane četiri zbirke poezije ovog vrhunskog bosanskog

pjesnika. Promotor je bio Samedin Kadić, koji je, između ostaloga, govorio o životu pjesnika, posebno predratnom na Tjentištu. Reкао je da njegov jezik izvire iz zemlje i da su njegove pjesme koje su sabrane u ovo djelo veliki bosanski iskorak ka svjetskoj književnosti. Autor Husein Hasković je rekao da je biografija jednog pjesnika njegovi stihovi. Rječnici su njegova stalna preokupacija i svima je preporučio da ih što više čitaju. Govorio je i o važnosti kuće u našim životima, ali je htio i da ova knjiga bude spomenik jeziku koji polahko nestaje iz upotrebe, a koji je obilježio njegov život.

Profesorica Jasmina Rahmanović magistrirala

Profesorica matematike u Behram-begovoj medresi Jasmina Rahmanović u ponedjeljak 11.3.2024. godine magistrirala je na Prirodno-matematičkom fakultetu u Tuzli. Tema njenog magistarskog rada je bila *Stabilnost nehiperboličkog ekvilibrijuma u diferentnim jednadžbama i diskretnim dinamičkim sistemima*. Mentor je bio dr.sc. Mehmed Nurkanović, redovni profesor na PMF-u. Odbrani magistarskog rada su prisustvovali članovi porodice, prijatelji i profesori iz Medrese.

Ramazanski zijareti Autobusa prijateljstva

Autobus prijateljstva i ovaj ramazan obišao je mnoge gradove u našoj domovini u periodu od 20.3. do 30.3.2024. godine. Bila je ovo izuzetna prilika da u mjesecu ramazanu učenici sa svojim profesorima posjete mnoge džemate, gdje su uz druženje sa džematlijama naučili mnogo o tim krajevima i običajima. U svim posjećenim mjestima za predavače i učenike pripremljeni su iftari, a nakon akšam-namaz učenicima i učenice izveli su program sastavljen od učenja Kurana, čitanja probranih hadisa, prigodnih recitacija o mjesecu ramazanu, učenja ilahija i kasida. Na kraju programa predavanja su održali profesori Behram-begove medrese, koji su bili u pratnji učenicima tokom svake posjete. Ove godine predavanja su održali profesori; Amel Smajlović, Bekir Šabić, Smail Hašarić, hfz. Abdullah Kapo, hfz. Muamer Kadrić, hfz. Mirnes Spahić, Idriz Memić, Nedim Alić, hfz. Asmir Imamović, Kemal Jusufović, hfz.

Nedžad Vehabović, Nedim Alić, Mehmedalija Čandić, Rijad Šestan, Halil Mehanović, hfz. Amir Hodžić i hfz. Edin Dedić. Autobus prijateljstva posjetio je; Gračanicu, Bijeljину, Orašje, Modriču, Puračić, Srebrenik, Živinice, Teočak, Kladanj, Janju, Bratunac, Brčko, Tuzlu, Vlasenicu, Kalesiju, Gradačac, Banoviće, Čelić, Zvornik, Gornju Tuzlu, Bosanski Šamac i Odžak. Godinama se realizuje ova aktivnost i Autobus prijateljstva deset dana je putovao kroz mnoge gradove. Podijeljeni u dvije grupe posjetili su sve međžlise Muftijstva tuzlanskog i u svaki donijeli posebnu toplinu pokazavši pravu ljepotu mjeseca ramazana. Najviše se Autobusu prijateljstva raduje omladina, jer je ovo prilika za druženje i sklapanje cjeloživotnih prijateljstava.

Proučena hafiska dova 100. hafizu Behram-begove medrese

U nedjelju 14.4.2024. godine u Zelinji Donjoj, proučena je hafiska dova Samir-ef. Mehiću. On je 100. hafiz Behram-begove medrese. Muhaffiz mu je bio hafiz Mirnes-ef. Spahić, profesor kiraeta u Behram-begovoj medresi. Hafiskoj dovi je prisustvovao muftija tuzlanski Vahid-ef. Fazlović, pomoćnik direktora za nastavu u Behram-begovoj medresi Fuad Imširović, veliki broj hafiza, profesora Behram-begove medrese, imama, članova porodice i prijatelja. Hafiz Samir-ef. Mehić posljednje stranice Kur`ana proučio je 6. marta pred Komisijom za polaganje hifza Rijaseta Islamske zajednice u Bosni i Hercegovini. On pripada 274. generaciji maturanata Behram-begove medrese. Radi kao imam u džamiji Bukvara u Gradačcu. Oženjen je i otac je dvoje djece.

Sjećanje na rahmetli Nurdina Gobeljića

Nurdin Gobeljić je bio učenik Behram-begove medrese, kada je zbog iznenadne bolesti 21.04.2012. godine preselio na Ahiret sa svojih šesnaest godina. Povodom godišnjice preseljenja na Ahiret održaće se memorijalni turnir u malom nogometu, koji organizuje naša škola i u kojem učestvuju svi učenici naše škole. Profesori i učenici će ga se sjetiti učenjem hatme.

Prvi na kantonalnom takmičenju iz Projekta građanin

Nakon što su osigurali ubjedljivo prvo mjesto na gradskom takmičenju iz Projekta građanin, naši učenici su pobjednici kantonalnog takmičenja, koje je održano online 16.04.2024. godine. Sa ovim plasmanom obezbijedili su učešće na državnom takmičenju. Tema koju je naša ekipa pripremila i obrazložila je *Zakonska regulacija električnih romobila*. Našu školu ove godine na takmičenju su predstavljali: Adem Bećirović, Abdulah Musić, Tarik Husić, Amel Islamović, Hamad Imamović, Faris Halilčević, Haso Imširović i Sadmira Salihović. Učenike je za takmičenje pripremala profesorica demokratije i ljudskih prava, Mersa Šabanović-Ibišević.

Na edukaciji o TV-nastupu

U ponedjeljak 22.04.2024. godine članovi Žurnalističke sekcije prisustvovali su radionici *Nastup na televiziji*. Radionica je održana na Filozofskom fakultetu, a pripremili su je studenti četvrte godine odsjeka Žurnalistika. Radionica se sastojala iz teoretskog i praktičnog dijela, a učenici su imali priliku da pred kamerom vježbaju čitanje vijesti i snimanje televizijskog priloga.

Odbojkašice na uzvratnom prijateljskom susretu s vršnjakinjama u Srebreniku

Članice sportskih sekcija Behram-begove medrese boravile su u Mješovitoj srednjoj školi u Srebreniku, u utorak 23. aprila. Odigrana je prijateljska utakmica u odbojci. Poslije ovog sportskog odmjeravanja snaga izveden je program povodom Međunarodnog dana engleskog jezika. U kvizu o poznavanju ovog najzastupljenijeg jezika u komunikaciji, naša učenica Džejla Nurikić osvojila je prvo mjesto. Druženje je nastavljeno na srednjovjekovnoj tvrđavi u Gornjem Srebreniku, poznatoj kao dom kralja Tvrtka Prvog Kotromanića. Na kraju su bile u potkupolnoj gradskoj džamiji u Srebreniku, u kojoj se se družile sa džematlijama.

Kurban za Behram-begovu medresu

Kurban za Medresu je akcija kojom Behram-begova medresa osigurava godišnje potrebe u mesu za ishranu svojih učenika. Muslimani-obaveznici klanja kurbana u ovoj akciji daruju svoga kurbana Behram-begovoj medresi. Oni koji žele mogu za svoje potrebe preuzeti jednu trećinu toga kurbana. U organizaciji Muftijstva tuzlanskog i Behram-begove medrese se nabavlja stoka, vrše potrebni veterinarski i sanitarni pregledi i na šerijatski način vrši klanje stoke. Kurban za Medresu se može uplatiti u Behram-begovoj medresi, u sjedištima medžlisa Islamske zajednice u Bosni i Hercegovini, putem bankovnog računa Muftijstva tuzlanskog, te na blagajni Muftijstva tuzlanskog. Gotovinske uplate u Tuzli se mogu izvršiti svakog radnog dana. Kurban za Medresu košta 490,00 KM. Uplate iz Bosne i Hercegovine se mogu izvršiti na sljedeći broj računa: **Primalac:** Muftijstvo tuzlansko **Račun broj:** 1321002002626215 kod NLB banke DD Tuzla **Na sve uplate obavezno naznačiti:** Uplata za kurban Kurban za Medresu se može uplatiti sve do subote 15. juna 2024. godine.

Dani porodičnih vrijednosti

U Behram-begovoj medresi je u četvrtak 25. aprila održana manifestacija Dani porodičnih vrijednosti. Program je bio raznovrstan i izveden je pred velikim brojem gošći, majki, učenica i učenika, prijatelja naše škole. Program se sastojao od učenja Kur`ana, čitanja odabranih hadisa, recitacija, ilahija, obraćanja direktora Behram-begove medrese dr. Ahmeda Hatunića, obraćanja dr. Seada Seljubca, te gostovanja poznatih najista hafiza Mirsada Mrahorovića i gosta iz Turske Serhata Ungera. Na programu su proglašeni i pobjednici literarnog konkursa, koje je Medresa raspisala u saradnji sa Pedagoškim zavodom. Tema za osnovne škole je bila *Majka-saksija lijepih riječi*, a tema za srednje škole bila je *Oči su slijepa, treba gledati srcem*. Za Medresu je raspisan poseban konkurs, a tema je bila *Ostani uspravan, kako ćeš pognute glave ispod zvijezda*. Prvo mjesto osvojila je Medina Hatunić, drugo mjesto je zauzela Amina Alibašić i treće mjesto osvojila je Fatima Muminović. Ova

manifestacija se organizuje sedamnaesti put, a tema je bila bereket. Pokušalo se kroz probrane ajete, hadise, i recitacije podsjetiti na razumijevanje bereketa kod naših starijih i na koji način se berićet danas može shvatiti.

Održana radionica "Isključimo se sa ekrana bar na jedan čas i upoznajmo se"

U okviru kampanje Manje ekrana, više života, koju provodi Ministarstvo obrazovanja i nauke Tuzlanskog kantona u osnovnim i srednjim školama, realizirana je radionica za učenike trećeg razreda naše škole u okviru izborne nastave iz psihologije. Radionica *Isključimo se sa ekrana bar na jedan čas i upoznajmo se* odnosi se na utjecaj svakodnevnog korištenja ekrana i posljedica koje ima na ostale aktivnosti (npr. učenje, odnosi s vršnjacima i porodicom, provođenje slobodnog vremena). Cilj je da učenici razmisle koliko vremena provedu sa mobitelom. Tako su učenice u prvom dijelu radionice navele i opisale prednosti i nedostatke ("dobre i loše strane") prekomjernog korištenja interneta/računara/pametnih telefona. Potom odredile prekomjerno korištenje interneta, opisale modalitete ovisnosti, te shvatile kriterije ovisnosti o internetu, koje mogu dovesti do nepoželjnih posljedica poput pretjeranog korištenja interneta. Također, radionica je obuhvatila i određene načine zaštite u virtualnom okruženju i umanjivanju potencijalnih negativnih posljedica. U drugom dijelu radionice imale su priliku osvijestiti informacione kanale, te centre tumačenja informacija koje čuju, vide, osjete te načine na koje informacijama daju značenje. Cilje je bio uporediti ove osjećaje sa osjećajima primanja informacija putem ekrana. U zaključku drugog dijela radionice su tako spoznale brže načine za učenje i pamćenje, osvijestile vlastite kapacitete i resurse, te shvatile i prepoznale koliko su jače i važnije informacije koje im daje život kada uključe sve svoje receptore i iste uporede sa informacijama i doživljajima primanja informacija putem ekrana. Radionicu je pripremila profesorica pedagogije i psihologije u našoj školi Nasiha Smajlović. Članice sekcije Zidnih novina naše škole dale su svoj doprinos kampanji Manje ekrana, više života. One su priredile panoe na ovu temu i izložile su ih

u prostoru naše škole. Neke od tema koje su obradile su *Prestani gledati u ekran, pogledaj oko sebe, Uticaj ekrana na našu svakodnevnicu, Koliko vremena dnevno provodimo gledajući različite sadržaje*.

Učenice posjetile biblioteku

U ponedjeljak, 29.4.2024. godine učenice prvog razreda posjetile su Narodnu i univerzitetsku biblioteku Derviš Sušić. Ovom prilikom bibliotekarke Suzana Antunov i Rusejla Omerbašić Džaferović upoznale su učenice sa kulturnim i historijskim blagom biblioteke. Poseban dragulj predstavlja bibliotečka građa na stranim jezicima, poput engleskog, arapskog, turskog i njemačkog jezika. Nakon toga održale su radionicu, koja bi trebala dodatno osvijestiti važnost čitanja knjiga.

Druženje sa dr. Mirsadom Hukić

U prostorijama Kantonalne privredne komore Tuzla u ponedjeljak 6.maja 2024. godine predavanje je održala dr. Mirsada Hukić. U predavanju se dr. Hukić osvrnula na nove tehnologije iz oblasti mikrobiologije i obrazložila je koliki je njihov uticaj na živote ljudi. Predavanju su prisustvovali učenici Behram-begove medrese koji idu na izbornu nastavu iz latinskog jezika. Organizator ovog predavanja za srednjoškolce je Građevinsko-geodetska škola iz Tuzle koja je dio projekta Velikani Bosne i Hercegovine. Dr. Mirsada Hukić je specijalista mikrobiologije, osnivač i direktor Zavoda za biomedicinsku dijagnostiku i ispitivanje, član je Evropske akademije nauka i Akademije nauka i umjetnosti Bosne i Hercegovine. Posvetila je godine stručnom usavršavanju iz oblasti imunologija, bakteriologija i virusologija. Objavila je preko tri stotine naučnih i stručnih radova.

Učenici Medrese na konferenciji "Bosna prije svega"

U Bosanskom kulturnom centru u utorak 7.05.2024. godine održana je Studentska konferencija o Aliji Izetbegoviću *Bosna prije svega*. O prvom predsjedniku Republike Bosne i Hercegovine Aliji

Izetbegoviću govorili su prof.dr. Amir Karić, Lejla Akšamija, kćerka Alije Izetbegovića i studenti stipendisti Fonda Bošnjaci. Razgovarali su o raznim aspektima njegova života, analizirajući njegova djela i njegov pogled na svijet. Razmišljanja o Evropi, njegovo poimanje trećeg puta, Pravda i pravo u razmišljanjima, Drugi o Aliji Izetbegoviću samo su bile neke od tema ove konferencije. Cilj održavanja konferencije je podsticaj mladim da izučavaju djela Alije Izetbegovića, kako bi se na taj način upoznali sa njegovim porukama, životom, radom i djelom. Tokom konferencije postavljena je izložba *Sjećanja* o mladosti i privatnom životu predsjednika. Izložba se sastoji od dokumenata, pisama i porodičnih fotografija. Konferenciji su prisustvovali učenici i članovi žurnalističke sekcije Behram-begove medrese. Organizator konferencije je Fond Bošnjaci, a suorganizatori su Muzej Alija Izetbegović, Fondacija Alija Izetbegović, Udruženje Mladih muslimana i Bosanski kulturni centar Tuzlanskog kantona.

Izveden program za maturantice "Ispraćaj naših ruža"

Povodom završetka školovanja 348. generacije maturantica Behram-begove medrese u četvrtak 9.5.2024. godine izveden je program koji tradicionalno pripremaju učenice trećeg razreda. Program je bio izuzetno emotivan, jer odlazak učenica koje su četiri godine živjele zajedno uvijek izazove velike emocije. Na početku programa učenica trećeg razreda hafiza Lejla Baturić proučila je ašere, članice hora su izvele tri pjesme, a član recitatorske sekcije Medina Hatunić pročitala je recital posvećen našim maturanticama. Pripremljena su i dva kraća video uradka o maturanticama, koje su priredile Temra Halilović, Lamija Jakubović i Lamija Hadžić. Kako to i biva na oproštajnim sijelima za maturantice, obavljena je i prozivka maturantica, njihovih razrednica i odgajateljice. Svakoj maturantici je uručen i simboličan poklon kao znak pažnje, koje su učenice trećeg razreda ručno napravile sa dosta ljubavi. U realizaciji programa učestvovala su Berina Mešinović, Kerima Hodžić, Amina Karahmetović, Kanita Hrvic, Ajla Merić, Amila Omerović, Lejla Karić, Nudžejma Drndić, Belkisa Mehmedović, Suada Dizdarević, Esmā Kovačević, Zerina Zambaković, Šejla

Hodžić, Merima Mehmedović, Merjem Jakubović, Fatima Muratović i Anida Muharemović za klavirom. Program povodom ispraćaja maturantica je postao tradicionalan događaj u našoj Medresi. Emotivan nastup učenica trećeg razreda izazvao je velike emocije. Četiri godine provedene u Medresi uvijek će ostati urezane u srca naših maturantica, a prijateljstva koja su stekla ostaće za čitav život. A pamtiće i ponijeti iz Medrese i ovaj događaj koji su mlađe učenice pripremile samo za njih u koji su utkale mnogo ljubavi. Programu su prisustvovala profesorice i učenice Medrese.

Učenice prvog razreda na radionici o mentalnom zdravlju

Radionica o mentalnom zdravlju *Briga o sebi kao temelj mentalnog zdravlja* održana je za učenice prvog razreda u četvrtak 9. maja 2024. godine. Radionicu je pripremila Larisa Lamija Subašić, diplomirani psiholog/psihoterapeut. Na radionici je govorila o konekciji sa sobom, brizi o sebi kao temelju našeg mentalnog zdravlja. Povezujući se sa našim istinskim potrebama, razumijevajući sebe, svoje emocije, otkrivajući svoja uvjerenja koja su nam vodila u životu, bismo da budemo bolje i kvalitetnije osobe koje će u budućnosti graditi društvo. Fokus radionice je bio na emotivnoj stabilnosti. Da bismo uistinu bili bliski sa drugima moramo graditi povjerenje. Mjerilo bliskosti vezuje se za poznavanje vlastitih granica i tek onda kada ih odredimo, istinski se povezujemo s drugima. Zbog toga upoznajemo sebe i koračamo ka sazrijevanju. Istakla je kroz radionicu psiholog Larisa Subašić.

Održan seminar za profesore engleskog jezika

U periodu od 11. do 12. maja 2024. godine, Behram-begova medresa je bila domaćin međunarodnom seminaru za profesore engleskog jezika Tuzla English Language Teaching Seminar (TELTS) 2024. Svečanosti otvaranja seminara koje je upriličeno prvog dana prisustvovali su predstavnici svih partnerskih institucija: direktor Behram-begove medrese u Tuzli dr. Ahmed Hatunić, ekspert za kulturu i obrazovanje pri Američkoj ambasadi

u Sarajevu Elizabeta Delić, Ministar obrazovanja i nauke Tuzlanskog kantona dr. Ahmed Omerović, dekanica Filozofskog fakulteta Univerziteta u Tuzli prof.dr. Nihada Delibegović Džanić i direktorica Regionalnog ureda za programe engleskog jezika (RELO) u Američkoj ambasadi u Beogradu Frances Westbrook. Prije svečanosti otvaranja, direktor Hatunić je primio predstavnik Ambasad Sjedinjenih Američkih Država u Bosni i Hercegovini i Regionalnog ureda za programe engleskog jezika i ovom prilikom su razgovarali o saradnji koja traje nekoliko godina. Također je izrazio zahvalnost zbog organizovanja ovog značajnog seminara kao i drugih edukativnih programa, koji se održavaju u Behram-begovoj medresi u Tuzli. Ovogodišnji TELTS program posebno posvećuje pažnju razvijanju vještina, koje su potrebne nastavnicima i njihovim učenicima da ispune zahtjeve modernog obrazovanja i općenito života u 21. stoljeću. Posebno se stavio naglasak na inkluzivne prakse i rad s učenicima s jezično-govornim poteškoćama, kreativne aktivnosti s učenicima (pedagoški pristup podučavanju engleskog jezika zasnovan na drami i teatru), te STEM/prirodno-naučne teme u nastavi engleskog jezika, kako bi se pomoglo učenicima da razviju svoje kreativne i tehničke vještine, vještine rješavanja problema i kritičko mišljenje. Ovaj seminar za profesore engleskog jezika iz Bosne i Hercegovine i susjednih država je izuzetna prilika da se doprinese kvalitetnijem obrazovanju mladih ljudi kako bi oni u budućnosti bili lideri i inicijatori promjene u svojoj zajednici i društvu u cjelini. Organizatori seminara su Behram-begova medresa i Ambasada Sjedinjenih Američkih Država u Bosni i Hercegovini, uz podršku Muftijstva tuzlanskog, Regionalni ured za programe engleskog jezika (RELO), te uz podršku Ministarstva obrazovanja i nauke Tuzlanskog kantona, Pedagoškog zavoda Tuzlanskog kantona i Univerziteta u Tuzli. Do sada je ovaj vid stručnog usavršavanja pohađalo više stotina nastavnika osnovnih i srednjih škola, univerziteta iz Bosne i Hercegovine i susjednih zemalja. Koordinator ovog seminara je bila Amila Hasanspahić, profesorica engleskog jezika u Behram-begovoj medresi.

Srednjoškolci razgovarali o umjetnoj inteligenciji u obrazovanju

U četvrtak 9. maja 2024. godine održana je 24. debata učenika srednjih škola. Učestvovalo je pedeset i osam učenika, koji su se okušali u govorništvo na bosanskom i engleskom jeziku i snimanju videospota. Tema ovogodišnje debate je bila *Umjetna inteligencija u obrazovanju*. U takmičenju govorništvo na bosanskom jeziku prvo mjesto osvojila je Kanita Kurpejović učenica Medrese Gazi-Isa beg iz Rožaja, drugo mjesto je zauzela Amra Tahić iz Gimnazije Ismet Mujezinović iz Tuzle i treće mjesto je zauzela Amila Škahić iz Mješovite srednje škole iz Srebrenika. U govorništvo na engleskom jeziku prvo mjesto je zauzeo Muratović Sprečo Amar, iz Mješovite srednje škole u Srebreniku. Drugo mjesto osvojio je Ammar Čidić iz Behram-begove medrese iz Tuzle i treće mjesto zauzela je Iman Škrebo iz Međunarodne škole Richmond Park iz Tuzle. Najbolji videospot ove godine su pripremili učenici Mješovite srednje škole Hasan Kikić iz Gradačca, drugo mjesto dijele Međunarodna škola Richmond Park iz Tuzle i Gimnazija Ismet Mujezinović i treće mjesto zauzela je Islamska gimnazija dr. Ahmed Smajlović iz Zagreba. U netakmičarskom dijelu učesnici su iznosili svoje ideje i stavove u formi radionica. Na ovogodišnjoj debati učestvovalo je pedeset i osam učenika iz jedanaest srednjih škola iz Bosne i Hercegovine, te učenici iz Medrese Gazi Isa-beg iz Rožaja i Islamske gimnazije dr. Ahmed Smajlović iz Zagreba. Organizator debate je Behram-begova medresa.

Medresini novinari na konferenciji o Izvještavanje bez stereotipa

Na Filozofskom fakultetu u petak 10.05.2024. godine održana je Studentska konferencija *Mediji za društvo razumijevanja; Izvještavanje bez stereotipa*. Na konferenciji su izlaganja imali poznati bosanskohercegovački novinari; Azra Husarić Omerović, novinarka Birn BiH, Šejla Džindo, novinarka RTVFBiH, Tahir Žustra, novinar NOVA TV i Adnan Čebić, novinar RTV SLON. O ovoj temu su diskutovali i studenti novinarstva iz Tuzle, Sarajeva, Banja Luke i

Mostara. Konferenciji su prisustvovali članovi žurnalističke sekcije Behram-begove medrese. Organizator Studentske konferencije je Odsjek za Žurnalistiku Filozofskog fakulteta Univerziteta u Tuzli.

Iz štampe izašao novi broj Misaka

U srijedu 15.05.2024. godine iz štampe je izašao novi broj školskog lista Misak. Tema ovog 109. broja je bosanski jezik. Kroz teme *Razvoj bosanskog jezika i Zastupljenost jezika u Evropi i drugim kontinentima* pokušalo se doći do podataka koliko govornika bosanskog jezika ima u svijetu. U ovom broju napisan je i rad o našem pjesniku Maku Dizdaru. Uz intervju koji je priređen sa poznatim književnikom Fajkom Kadrićem, možete pročitati još dosta zanimljivih sadržaja. Teme koje su zastupljene u ovom broju su *Posljednja objava, Ukrasi ahlaka, Nevidljivi svijet, Učenici iz dijaspore, Naši talenti, Sport, Učenici na razmjeni, Zanimljivosti, Ramazanska praksa u Bosni i Vremeplov*.

Maturanti prošetali svojim gradom

Ulicama svoga grada u četvrtak 16.05.2024. godine u svečanoj povorci prošla je još jedna generacija maturanata Behram-begove medrese. Maturanti su u pratnji svojih razrednika i odgajatelja krenuli od Behram-begove medrese i prošetali do Trga slobode, a potom i do Trga prekinute mladosti (Kapije), na kojem je 25. maja 1995. godine ubijena 71 mlada osoba. Tu su položili ruže i proučili fatihu, te su se uputili prema Džindić džamiji. Tu su se prisjetili nekoliko profesora, koji su ukopani u haremu džamije. Nakon toga su krenuli prema mjestu stare zgrade Behram-begove medrese. Tu su nakon fotografisanja završili šetnju. Ova generacija 348. generacije maturanata Behram-begove medrese broji 56 učenika i 57 učenica. Razrednici maturantima su Samir Spahić i Kemal Jusufović, i odgajatelj Smail Hašarić. Razrednice maturanticama su Emina Hatunić i Mukelefa Behaderović, a odgajateljica je Ehlimana Suljić. Ova generacija je iznjedrila jednog hafiza. Brojni takmičari su tokom školovanja na najljepši način predstavljali Medresu. Učenik generacije je Husein Jašić, a učenica generacije je Fatima Huskanović.

Maturskom akademijom koja će se održati u subotu 18.05.2024. godine, svečanosti ispraćaja ove generacije će se završiti.

Maturanti 348. generacije Behram-begove medrese ispraćeni svečanom akademijom

Svečana akademija 348. generacije Behram-begove medrese održana je u subotu 18. maja 2024. godine u Bosanskom kulturnom centru u Tuzli. Program su izveli maturanti, a sastojao se od učenja Kur'ana, ilahija i kasida i recitacija. Obraćanja su imali direktor Behram-begove medrese dr. Ahmed Hatunić, muftija tuzlanski Vahid-ef. Fazlović, ministar obrazovanja i nauke Tuzlanskog kantona dr. Ahmed Omerović i izaslanik Reis-ul-uleme hfz. Mensur Malkić. Posljednju prozivku svojih učenika obavili su razrednici. Razrednici maturantima su bili profesori Samir Spahić i Kemal Jusufović, a odgajatelj Smail Hašarić. Razrednice maturanticama su bile profesorice Emina Hatunić i Mukelefa Behaderović, a odgajateljica Ehlimana Suljić. Ova generacija broji 56 učenika i 57 učenica. Učenik generacije je Husein Jašić, a učenica generacije je Fatima Huskanović. Ova generacija je iznjedrila izuzetne talente, koji su na najbolji način predstavljali Behram-begovu medresu na raznim takmičenjima, nastupima i sportskim događajima. Ostac će upamćena kao generacija koja je došla u Medresu u vrijeme pandemije. Ipak, uz sve poteškoće i izazove uz veliki trud i zalaganje prebrodili su početne probleme i izrasli u odrasle i odgovorne osobe. Svečana akademija je bila izuzetno emotivna, a uz roditelje maturanata i prijatelje programu su prisustvovala i mnogobrojne zvanice iz političkog, društvenog, obrazovnog i kulturnog života Tuzle i Tuzlanskog kantona.

Medresin tim u Parlamentarnoj skupštini

U Parlamentarnoj skupštini Bosne i Hercegovine u Sarajevu 17.05.2024. godine održana je Finalna smotra pobjednika takmičenja "Projekt građanin/Ja građanin" za školsku 2023/24.godinu. Na finalnoj smotri učestvovali su učenici iz 19 gradova Bosne i Hercegovine. Mladi lideri su predstavili svoje inspirativne prijedloge

javne politike, koje su im donijele pobjedu na kantonalnom nivou takmičenja Projekt građanin. Ekipe iz Behram-begove medrese je pobijedila na kantonalnom takmičenju održanom 16.04.2024. godine. Tema koju su naši učenici istražili i obrazložili je Zakonska regulacija električnih romobila. Našu školu su predstavljali Adem Bećirović, Abdulah Mušić, Tarik Husić, Amel Islamović, Hamad Imamović, Faris Halilčević, Haso Imširović i Sadmir Salihović. Učenicke je pripremala profesorica demokratije i ljudskih prava u našoj školi Mersa Šabanović-Ibišević.

Na otvaranju izložbe članovi sekcije Kreativnih radova

U Bosanskom kulturnom centru u Tuzli u srijedu 22.05.2024. godine upriličena je izložba učenika Građevinsko-geodetske škole smjera slikarski i grafički dizajn. Izložbi je prisustvovao je veliki broj prijatelja škole, a obraćanje je imao ministar obrazovanja i nauke Tuzlanskog kantona dr. Ahmed Omerović. Ovom događaju su prisustvovali i učenice Behram-begove medrese, članovi sekcije Kreativnih radova. Umjetnički radovi učenika ove škole, u koje spadaju slike i grafički dizajn odražavaju posebnu maštovitost, tehničku vještinu i posvećenost. Svaki rad priča je za sebe, a teme i stilovi koji su korišteni su raznoliki.

Volonteri i humanitarci pripremali i dijelili hranu

Volonteri Behram-begove medrese i članovi humanitarne sekcije su u ponedjeljak 13.05.2024. godine volontirali u Narodnoj kuhinji Imaret. Taj dan su zajedno sa osobljem Narodne kuhinje pripremali i dijelili obroke za veliki broj korisnika. Merhametova narodna kuhinja je najveća u Bosni i Hercegovini. Svakodnevno kroz nju prođe veliki broj ljudi.

Treći razred u Memorijalnom centru Kapija

Učenicke trećeg razreda Behram-begove medrese su u četvrtak 23.05.2024. godine posjetile Memorijalni centar Kapija. U muzeju su mogle pogledati fotografije ubijenih sa njihovim ličnim

predmetima, kao što su pehari, medalje, satovi, omiljene igračke. Kustos Muzeja Medina Lolić upoznala je učenice sa historijatom ovog muzeja. Nakon toga su pogledale film koji govori o 25. maju 1995. godine kada je granata sa Ozrena ubila 71 osobu, koje su bile prosječne starosti 23 godine. Nakon posjete Muzeju učenice su na spomeniku Kapija položile cvijeće i proučile fatihu. Ova posjeta je realizovana povodom 29. godišnjice od ovog strašnog zločina. Učenicice koje idu u Medresu, a dolaze iz Austrije, Njemačke i Francuske, te iz manjeg entiteta, prvi put su gledale ovaj film i dobile su dosta novih informacija o ovom događaju. Memorijalni centar Kapija je otvoren 22.05.2020. godine kako bi podsjećao na 71 ubijenu i 200 ranjenih osoba, uglavnom djevojaka i mladića. On je svojevrsan arhiv o ratnom zločinu dobro dokumentovan sa videozapisima, ličnim predmetima i fotografijama ubijenih. Oficir vojske RS Novak Đukić je jedini optužen za ovaj zločin, a trenutno se krije u Srbiji.

Generacija učenika drugog razreda u Travniku

U četvrtak 23.05.2024. godine četiri odjeljenja drugog razreda Behram-begove medrese posjetili su Vranduk i Travnik. Prva destinacija bio je Vranduk, gdje su naučili dosta o prošlosti ove srednjovjekovne tvrđave. Ova tvrđava je podignuta krajem XIV stoljeća i bila je banski, a zatim kraljevski grad. Prvi put se spominje 1410. godine. U njemu su primana izaslanstva, potpisivani su ugovori, i izdavale su se povelje. Eugen Savojski je 1697. godine zaobišao Vranduk, zbog težine osvajanja. Tvrđava je restaurirana i proglašena je nacionalnim spomenikom Bosne i Hercegovine. Nakon Vranduka učenici su sa svojim profesorima posjetili Travnik. Obišli su Elči Ibrahi-pašinu medresu. Tom prilikom učenicima se obratio profesor Abdullatif Muhamed. Upoznao je učenike sa historijom ove škole i nakon toga su obišli cijeli kompleks. Nakon obilaska Medrese prošetali su gradom i pogledali su Šarenu džamiju. Ova džamija je poznata kao Sulejmanija, a izgrađena je 1815. godine. Podigao ju je bosanski vezir Sulejman-paša Skopljak. Džamija je poznata po lijepo ukrašenom unutrašnjem dijelu, vanjskoj fasadi i bezistanu u kojem su smješteni dućani. Bila je ovo izuzetno sadržajna i zanimljiva posjeta vezirskom Travniku.

Održana Konferencija SPEAK UP

U periodu od 24-26.5. učenici naše škole zajedno sa profesorom biologije u Behram-begovoj medresi Edinom Brigićem prisustvovali su konferenciji pod nazivom SPEAK UP. Ovo je prva konferencija ovog tipa, a za cilj je imala promociju STEM nauka, engleskog jezika i debate. Učestvovalo je trideset učesnika. Glavna aktivnost na ovoj konferenciji bila je priprema parlamentarne debate, koju su učenici pripremali u grupama. Učenici su također imali priliku da prisustvuju na nekoliko panel diskusija, a predavači su bili prof.dr. Monia Avdić, dr.sci. Engin Obučić, prof.dr. Edvin Škaljo, Sabina Softić (Deloitte) i Amra Tabaković. Pored toga učenicima je omogućeno da kroz eksperimente primijene svoje znanje iz hemije. Na konferenciji su učestvovali učenici iz Bosne i Hercegovine, Sandžaka i Crne Gore. Suorganizatori ove konferencije su Islamska zajednica u Bosni i Hercegovini i Gazi Husrev-begova medresa. Domaćin i organizator konferencije je Prva bošnjačka gimnazija iz Sarajeva.

Konkurs za upis učenika u prvi razred

Konkurs za upis učenika u prvi razred medresa u Bosni i Hercegovini i Sandžaku za narednu školsku godinu objavio je Preporod u broju od 15. maja ove godine. Prema odredbama tog konkursa, kandidati neće polagati prijemni ispit. Aplikacija za online prijavu kandidata za upis u Behram-begovu medresu bit će aktivirana 1.6.2024. godine na web-stranici www.bbm.edu.ba. Kandidiranje za upis će se moći obaviti samo preko te aplikacije, tj. svi kandidati će moći to obaviti u nekoliko jednostavnih koraka. Uz popunjenu prijavu za upis, svaki kandidat će elektronski priložiti odgovarajuće dokumente. Kandidati koji su učenici generacije u osnovnoj školi i učenici koji su ostvarili odličan uspjeh iz svih nastavnih predmeta i primjerno vladanje u posljednja četiri razreda osnovne škole, hafizi, uz ocjenu primjerno iz vladanja u završnom razredu osnovne škole, uz priložene dokumente kojima potvrđuju svoj status, stječu pravo na upis u prvi razred medrese bez daljih uvjetovanja i njima se dodjeljuju najviše ocjene i bodovi iz takmičenja. Rok za

prijavu kandidata je od 1. do 14. juna 2024. godine. Behram-begova medresa će, nakon što istekne ovaj rok, objaviti rezultate upisa na svojoj web-stranici.

Održan kamp za historičare

U periodu od 24-26.05.2024. godine u Behram-begovoj medresi je održan Kamp za historičare. Oni su u ovom periodu učili o svojoj domovini, družili su se i obilazili znamenitosti Tuzlanskog kantona. U petak 24.05.2024. godine obišli su Trg Slobode, Soni trg, Kapiju i Turalibegovu džamiju. U subotu 25.05.2024. godine na otvaranju kampa obratili su se direktor Behram-begove medrese dr. Ahmed Hatunić i Seid Eminović, iz Uprava za obrazovanje i nauku Rijaseta Islamske zajednice u Bosni i Hercegovini. Uslijedila je posjeta poznatoj srednjovjekovnoj Gradini u Srebreniku. Zatim su boravili u Gradačcu, gdje su obišli kulu Husein-kapetana Gradašćevića i oklopni voz. Historijski časovi su održani na svim ovim lokacijama. U nedjelju 26. maja obišli su mezarje na Slanoj Banji i Turali-begov kompleks. Na kampu su učestvovali učenici iz Gazi Husrev-begove medrese iz Sarajeva, Elči Ibrahim-pašine medrese iz Travnika, Medrese Reis Džemaludin-ef. Čaušević iz Cazina, Karadoz-begove medrese iz Mostara, Medrese Osman-ef. Redžović iz iz Visokog, Medrese Reis Ibrahim-ef. Maglajlić iz Banja Luke, Prve bošnjačke gimnazije iz Sarajeva i Behram-begove medrese iz Tuzle.

Roy Gutman na promociji knjige "Svjedok genocida"

U Bosanskom kulturnom centru u Tuzli 30.05.2024. godine održana je promocija knjige *Svjedok genocida*, autora Roya Gutmana. Velika sala BKC-a je bila ispunjena poštovaocima djela nagrađivanog novinara, koji je svojim izvještavanjem iz Bosne u periodu 1992. godine svjedočio protjerivanju i svemu onome što je kasnije okarakterisano kao genocid. O knjizi su govorili dugogodišnji prijatelji Roya Gutmana novinarka Almasa Hadžić i dr. Elmir Jahić. Novinarka Almasa Hadžić se prisjetila svog prvog susreta sa Gutmanom, te je govorila o njegovom objektivnom izvještavanju o zločinima nad Bošnjacima. Dr. Elmir Jahić se osvrnuo na značaj

ponovnog štampanja ove izuzetno dokumentovane knjige i na njenu važnost u ovom vremenu.,, Pojam genocid nad Bošnjacima prvi je spomenuo upravo Roy Gutman. Kasnije smo presudama dobili satisfakciju, a nedavnom Rezolucijom o Srebrenici i političku.“ Istakao je promotor dr. Elmir Jahić. Autor Roy Gutman se posljednji obratio. Rekao je da je Tuzla, a i Bosna i Hercegovina sada sretnije mjesto, nego kada je on boravio ovdje. Pričao je o svom susretu sa silovanim Bošnjakinjama iz Brezovog Polja i logora Liplje, te o dokumentovanju njihovih priča. Također je rekao da novinari ne mogu zaustaviti ratove, ali mogu dokumentovati zločine, iznijeti istinu, doprinijeti donošenju zakona. Boraveći ovdje u ratnom periodu naučio je dosta o bosanskoj kulturi i stekao je prijatelje za cijeli život. Roy Gutman je poznati novinar rođen je 1944. godine u New York City, Sjedinjenim Američkim Državama. Njegova knjiga Svjedok genocida izašla je 1993. godine i govori o zločinima srpske vojske nad Bošnjačkim civilima. Njegov doprinos je najveći u otkrivanju zloglasnih srpskih logora, koji su upravo zbog njegovog izvještavanja i zatvoreni. Zahvaljujući tome spašeni su mnogi životi. Zbog izvještavanja iz Bosne 1993. godine dobio je i Pulitzerovu nagradu. Urednici promoviranog izdanja su Resul Mehmedović i Sanjin Jakić, a izdavač je kuća Dialogos. Na promociji je ratni gradonačelnik Tuzle Selim Bešlagić uručio poklon Royu Gutmanu, grb sa ljljanima. Promociji su prisustvovali učenici Behram-begove medrese.

Dan alumnista Behram-begove medrese

U petak 31.05.2024. godine u Behram-begovoj medresi je održan program povodom Dana alumnista. Program su izveli članovi hora i orkestra naše škole, te članovi recitatorske sekcije. Sastojao se od učenja Kur`ana, čitanja probranih recitala i izvođenja ilahija. Na programu se obratio direktor Behram-begove medrese dr. Ahmed Hatunić. Uz alumniste naše škole prisustvovali su i rukovodilac Službe za vjerske poslove i obrazovanje Muftijstva tuzlanskog dr. Mensur Husić, ministar za rad, socijalnu politiku i povratak Fadil Alić, direktor biblioteke Behram-beg mr. Admir Muratović i predsjednik alumnista Behram-begove medrese Dženan Rahmanović.

Behram-begova medresa ima 2800 diplomanata. Dan alumnista se obilježava 31. maja. Tada je održana prva akademija maturanata 1997. godine. Prva osnivačka skupština održana je 30. marta 2003. godine i u ovih dvadeset godina dosta aktivnosti je realizovano. Ažurirani su podaci alumnista u zajedničku bazu, održavaju se seminari, tribine i druge aktivnosti.

Maturski Misak izašao iz štampe

U ponedjeljak 3.6.2024. godine iz štampe je izašao 110. broj Misaka. Ovaj broj u potpunosti je posvećen 348. generaciji maturanata Behram-begove medrese i oni su ga pripremili. Sa ovim brojem se opraštamo od ovogodišnjeg rukovodstva Misaka, glavne urednice Fatime Mustafić, zamjenika glavne urednice Jusufa Mehmedčehajića, tehničkih urednika Adema Bećirovića i Amela Islamovića, kao i od članova redakcije koji završavaju školovanje u Medresi. Ova redakcija uspjela je pripremiti četiri broja Misaka koji su bili izuzetno sadržajni, sa dosta raznovrsnih tema i zanimljivih intervjuua. Posjete raznim izložbama, promocijama knjiga, konferencijama, posjeta medijima u Sarajevu i Tuzli, samo su mali djelić onoga što je ova redakcija realizovala u protekloj školskoj godini.

Mekteblije iz Šija u Medresi

Behram-begovu medresu su u srijedu 5.6.2024. godine posjetili polaznici mektebske nastave iz džemata Šije, koji pripada Medžlisu Islamske zajednice Tešanj. Oni su sa svojim roditeljima i vjeroučiteljem Ševalom Delićem proveli poslijepodne u našoj školi i ovom prilikom obišli su njen kompleks. Sa historijom, nastavnim planom i programom upoznao ih je Bekir Šabić, odgajatelj u Behram-begovoj medresi. Bila je ovo izuzetna prilika da se osnovci upoznaju sa svim mogućnostima koje nudi Medresa. Nakon obilaska sportskih terena, internata, džamije i amfiteatra neki od njih su izrazili želju da svoje školovanje nastave u našoj školi.

Žurnalistička sekcija Medrese u Novom Pazaru

Posjeta Novom Pazaru članova žurnalističke sekcije realizovana je u periodu 7-9. juna 2024. godine. U petak 7. juna na putu za Novi Pazar zaustavili su se i u malom gradu Sjenici, smještenom na Pešterskoj visoravni u kojem se nalazi prelijepa džamija Sultan Velide iz 19. stoljeća. Ona je jedina carska džamija u Sandžaku. Izuzetno zanimljivo zdanje je i Sjenička kuća, koja će uskoro biti pretvorena u muzej, a smještena je u centru grada. Dolaskom u Novi Pazar uslijedio je obilazak centra grada. Odgajatelj Mersudin Mavrić pobrinuo se da pokaže zanimljivosti i historijske znamenitosti ovog najvećeg grada u Sandžaku. I subota je bila planirana za obilaske. Obišli su Fakultet za islamske studije, a o načinu studiranja i mogućnostima koje se nude nakon završetka pričao je profesor Senad Saračević. Uslijedio je obilazak Internacionalnog univerziteta Novi Pazar u kojem se nalazi i sjedište Sandžak Televizije. Novinarica Alma Sofić pričala je o programskoj šemi i o projektima ove medijske kuće. Poslije predstavljanja programa napravljen je i prilog u kojem su naši učenici imali priliku da pričaju o žurnalističkoj sekciji Behram-begove medrese. Posjetom Islamskog centra Gazilar završen je i edukativni dio ove posjete Novom Pazaru. Bilo je ovo izuzetno zanimljivo putovanje na kojem su učenici naučili dosta o prošlosti Sandžaka, ali i o sadašnjosti i izazovima sa kojima se susreću Bošnjaci.

Treći na konkursu Asocijacije za umjetničku fotografiju BiH

Behram-begova medresa osvojila je treće mjesto na 17. festivalu fotografije i filma Tuzla 2024. Polaznici programa multimedije su konkurisali sa trideset i tri fotografije koje su pripremili povodom 1. marta, Dana nezavisnosti Bosne i Hercegovine. Konkurs redovno raspisuje Asocijacija za umjetničku fotografiju u Bosni i Hercegovini. U Medresi je program multimedije počeo u novembru 2023. godine i trajao je šezdeset nastavnih sati. Polaznici su dobili i certifikat za pohađanje škole fotografije I stepena Elementarna fotografija, koju izdaje Asocijacija za umjetničku fotografiju Bosne

i Hercegovine. Polaznice kursa Nejra Nurikić i Temra Halilović su pripremile i promotivni video o Behram-begovoj medresi. Također su gostovale na jutarnjem programu RTVTK gdje su predstavile ovu i ostale sekcije naše škole. Program podučavanja multimedije je vodio profesor, producent i instruktor fotografije Robert Andrejaš.

Predstava "Na Božijem putu" izvedena u Janji

U četvrtak 13.06.2026. godine pred punom dvoranom Doma kulture u Janji Dramski studio Behram-begove medrese izveo je dramu Ahmeda Muradbegovića "Na Božijem putu". Organizatori predstave su Behram-begova medresa i Medžlis Islamske zajednice Janja. Naši učenici ponovo su dokazali da s ovom dramom mogu plijeniti pažnju i pokazati svoje izrazite glumačke talente. Druženje s ljubaznim domaćinima nastavljeno je i poslije, u Omladinskom centru MIZ Janja.

Održan Ljetni kamp za srednjoškolce

U periodu od 28. do 30. juna grupa učenika Behram-begove medrese je učestvovala u Ljetnoj školi demokratije 2024. Kamp je održan u Sportsko-rekreativnom centru Ajdinovići i okupio je 230 učesnika iz cijele Bosne i Hercegovine, zajedno sa njihovim mentorima. Tema ovogodišnjeg kampa bila je "Slobodno govori! Snažno se bori! - protiv govora mržnje". Kroz interaktivne radionice i diskusije, naši učenici su istraživali razliku između slobode govora i govora mržnje, uz naglasak na važnost medijske pismenosti i pravnih okvira koji štite slobodu izražavanja. Program je obuhvatao niz interaktivnih radionica koje potiču kritičko razmišljanje i razmjenu ideja, a u konačnici rezultiraju konkretnim alatima i koracima koje svako od učesnika može primijeniti u svojoj školi i široj zajednici kako bi doprinio suzbijanju govora mržnje. Osim radionica koje je pripremio CIVITAS, učesnici su imali i dodatne aktivnosti: kamperski safari i sportsko-zabavne aktivnosti "Fair Play Against Hate". Ove aktivnosti omogućile su učenicima i nastavnicima da se u pozitivnoj atmosferi druže i uživaju u prirodi stvarajući nova prijateljstva.

Proučena hafiska dova Mudžahidu Smajloviću

U džamiji Islamskog centra u Živinicama 7.7.2024. godine proučena je hafiska dova Mudžahidu Smajloviću. Muhafiz mu je bio hafiz Amir Nedimović i njegov otac Asim Smajlović. Hifz je položio pred Komisijom Rijaseta Islamske zajednice u Bosni i Hercegovini 3. juna 2024. godine. On je 102. hafiz Behram-begove medrese. Dovi su prisustvovali izaslanik muftije tuzlanskog dr. Ahmed Hatunić, direktor Behram-begove medrese, glavni imam Medžlisa Islamske zajednice Živinice Sedin- ef. Karić, predsjednik MIZ Živinice Fehim Šljivić, porodica mladog hafiza, muderisi, imami, vakifi i brojne džematlije. Diplomom u ime Rijaseta Islamske zajednice hafizu Smajloviću je uručio direktor Behram-begove medrese dr. Ahmed Hatunić. Hafiz Mudžahid Smajlović rođen je 2001. godine u Tuzli, od oca Asima i majke Fikre. Završio je Behram-begovu medresu u Tuzli. Nakon medrese upisuje IUS u Sarajevu. Pored mnogobrojnih obaveza koje ima on igra za košarkaški klub IUS Wolves. U protekloj sezoni je ocijenjen kao jedan od najperspektivnijih mladih igrača.